



84(2Рос=коми)-5
758 ф.

СЕРАФИМ
ПОПОВ







□ 58
СЕРАФИМ
ПОПОВ

Лоз енж улын

404540

НАЦИОНАЛЬНАЯ ДЕТСКАЯ
ВИБЛИОТВКА РЕСПУБЛИКИ КОМИ
ИМ. С.Я.МАРШАКА

167981, г. Сыктывкар, Советская, 20

Коми
книжной
издательство

1960

ПОПОВ
СЕРГЕЙ

Оформление С. А. Добрякова

404540

УДК 62-75
Информационно-издательский центр
Института математики и механики
Уральского государственного университета
Свердловск



Партия
да Родина
илюция



ПАРТИЯ ЙЫЛЫСЬ КАНТАТА

I



арма весьтын кыптысь зарни кыа
Ылө вөтліс мулысь кокни ун.
Чикышьяслөн мелі сёрни шыён,
Чужан муой, сувтіс тәнад лун.

Мича каръяс весьтөд вуджө шонді,
Сьөкыд шепнас өвтчө воём сю.
Шудлун йылысь помасьлытөм сёрни
Бара паніс миян Эжва ю.

Лыддьө поезд кольөм перегонъяс,
Из шом пластө писькөдчө комбайн.
Варов нывъяс, миян коми зонъяс
Дружнөй уджлысь юкөны тшөтш пай.

Строитель, шахтёр да проходчик
Сувтөны вахта вылө,
И тә йылысь, Партия-Зодчөй,
Сьыланкыв юргө кылө.

Колхозник да вөр лэдзысь орччон
Мунёны ыбё, ягё,
А вильыш төв збоя ворсё
Кыаысь сөстөм флагон.

Мир да дружба быд сьёлөмын оло,
Ота-мөдлы быдөн лоо ёрт.
Оз од прөста чарла да ён мөлөт
Аслас кыин кут и коми морт.

Медбур кывъяс, медся ыджыд чолөм
Тэныд, Партия, ми шуам пыр.
Сетін мортлы мездлун, шуд да олөм,
Кодөс корсим му шар вылысь дыр.

II

Дыр, ой, зэв дыр синва киссис,
Сьёлөм йирис дой,
Парма морөсөдз эз пьсьтлы
Радлунлөн сөдз войт.

Шогкөд өти кадө чужліс
Вөрын олысь морт.
Сійөн вой төлыслөн шувгөм
Вөлі сэтшөм нор.

Татшөм войө тэ кывлін өд, Эжва,
Ссылной вокъяслысь восьлалан шы?
Корсьны тышын и правда, и мездлун
Найөс кыпөдіс Ленинлөн кыв.

Пурйөн кывтысьлысь топөдліс кияс
Ичөт воклысь моз зэв бур роч вок.
Мунны аскилань Партия миян
Восьтіс уджалысь морт водзё мог.

Кыптö, сувтö миян кыа,
Локтö югид лун!—
Тайö вына, гора шыыс
Садьмөдiс став му.

Аслас вокъясыскөд орчөн
Сувтiс коми морт.
Ыджыд тышын вöля корсьны
Кыпöдчис народ.

Некор йöзлы шоглун вылö
Оз бергöдчы вой.
Ытва дырйи кывтiс ылö
Оккупантлөн шой.

III

Мыйла сьөлөмным мудзсö оз тöдлы,—
Вермас висьтавыны тайöс быд морт.
Мый ми вöчам — ми вöчам ог мөдлы,—
Ота-мөднымлы быдөн бур ёрт.

Югид школаяс челядьлы лэптам,
Видзам синмөс моз му вылын мир.
Чужан му вывтi кыпыда ветлам,
Уджлысь радлунсö славитам ми.

Югид шондiыс ми весьтын дзирдалö пыр,
Тувсов ыб сё мотор шыён жургö.
Эшелон төвзьö лунвылö из шомён тыр,
Помся кывтöны ю вывтi пурьяс.

Тэн, рөдимöй страна, сетам сьөлөмысь би,
Тэкөд, Партия, восьлалам водзö.
Коммунизмыслысь югöрсö аддзам нин ми,—
Кыптö му весьтö медмича кодзув.

IV

Вöччис муным тувсов сад моз,
 Воис йöзлы ыджыд шуд.
 Тэныд, Партия, сё аттьö
 Шуам гораа быд лун.

Медбур кывъяс, медбур думъяс
 Сиö тэныд дзик быд морт.
 Тэкöд лоны, тэкöд мунны —
 Миян öти ыджыд мог.

Мед юргас пыр тэ йылысь, Партия, слава!
 Слава тэн, Партия, слава!
 Нэмъяс чöж слава!
 Великöйлы слава!
 Доналы слава!
 Некор оз куслы слава!

1956 во.

КОММУНИЗМЛӨН КОДЗУВ

Тайё абу вөт,
А збыльысь ыджыд чудё,
Вөчны вермис
Сөмын миян морт:
Төлысьлань ракета лэдзис...
Шуда
Сылөн югыд, вына,
Паськыд борд!

Кытысь аддзан,
Корсян сэтшөм кывъяс,
Ошкыны советскöй
Йöзлысь нэм?
Выль планета
Шондiлөн пöсь сывйын,
Миян герба
Выль планета эм!

Тыдавтөм орбита
Ассьыс вуджö,
Некор сэсса
Сийö оз нин ор.
Шуласны,
Выль кодзув кодыр чужö,
Шудаджык на лоö
Миян морт.

Оти бõрся
Мõд ракета петас
Югдõдны
Вселеннойислысь эрд.
Дзирдав уна тысяча
Планетаын
Коммунизмõ мунысь
Мулõн герб!

1959 во.

ВЫЛЬ ВОСЯ ВОЙӦ

Лыдтӧм кодзулӧн енэжыс ойдас,
Озъяс лым чир, кыз бисерлӧн войт.
Быттӧ паметӧ ылалӧм мойдысь
Пуксяс му весьтӧ Выхь восья вой.

Еджыд пась улын ланьтасны пуяс,
Найӧс кодзыдыс, майбыр, оз сот.
Петны пыр эськӧ зэв ылі туйӧ,
Чужан мунымлысь аддзывны от!

Татшӧм мича вой овывлӧ шоча,
Весиг радлунтӧ дзевны он куж:
Тӧдтӧм войтырлы комиӧн, рочӧн
Вӧзъян сьӧлӧмсянь медыджыд шуд.

Тӧлысь син пӧвнас нюмъѣвтас тэныд,
Спутник югдӧдас космослысь эрд.
Муса Рӧдина!
Миян бур нэмын
Лэптін тӧлысьӧдз тэ ассьыд герб!

Туйын, керкаын войыс кӧть суас,
Быдӧн бур кывйӧн казътас важ во;
Первой тост медводз сы вӧсна юас,
Медым радлуны помыс эз во.

Кыа петігөн рөмыдыс сылас,
Шонді енәжө путкыльтас би...
Коммунизм, вокъяс, абу нин ылын,
Сылысь воськовсө кылам нин ми!

1959 во.

* * *

Кымөртөм асылө петав,
Видзөдлы: енэжлысь от
Вундө сөветскöй ракета,
Му шарлөн спутник да ёрт.

Нәмъяс чөж зэв ылі мирас
Весиг эз писькөдчыв мөвп.
Космослөн пыдөстөм йирын
Пыр вөлі пемыд да чөв.

Сэтчө, көн помасьö сынөд,
Оз кыпөд лэбачлөн борд.
Чардбиысь ыджыдджык вынсö
Спутниклы сетіс народ,

Коді выль олөмлысь эра
Восьтіс, кыз медыджыд шуд...
Радуйтчам ми — СССР-өс
Панйыны некод эз куж!

Лөк йөзлөн лөгыс мед петө,
На пыдди нюмъялам ми.
Нуö сөветскöй ракета
Миян планеталы мир.

1959 вc.

БУР АСЫВ

Кага синъясысь ясыд
Сувтö, аддзаныд, луныс.
— Шуда асыв!
— Бур асыв!—
Кöсья быдöнлы шуны.

Медым нэриник дзоридз,
Коді шонділань кыссьö,
Садьмас лэбачлөн горысь,
Сöстём лысваён мыссяс.

Туйö веськалём ёртлы —
Вöлök кокниа вуджны,
Медся шуда выль мортлы
Тайö асылö чужны.

Тэ кö мудзин да узян,—
Бура шойчыны тэныд!—
Аски выль вынён пузяс
Коммунизм тэчысь смена.

Юргы, сьыланкыв миян,
Чужан сиктын и расын!
Шонді быдöнлы сиö
Шуда асыв,

бур асыв.



Аз енж улын



1911

THE

OFFICE OF THE

SECRETARY OF THE

NAVY

WASHINGTON, D. C.

NOV 15 1911

RECEIVED

NAVY DEPARTMENT

WASHINGTON, D. C.

NOV 15 1911

Very truly yours,

John D. Long

Secretary of the Navy



МИ ВОИМ ЧУМӨ



и воим чумө вой шөр войын
Да узыны уськөдчалім пыр,
А зэрсө енэж помся койис
Дзонь море ва кытчөдз эз быр.

Кор вылад некөн абу косыс,
Он думайт корсьны кынөмпөт.
Сэк бара тэрмасьомөн косас
Мудз юрө ичөтдырся вөт.

Ог чумын куйлы...
Ог. Ме ылын,
Көн коркө өзйис челядь сям,
И мелі кияснас, ме кыла,
Кызд төбө-шонтө муса мам.

Бур шудыс туй выв мортлөн эм кө,
И йирмөг войыс абу кузь.
Но мыйла өтнас пöрысь ненка
Ас чумас та дыра оз узь?

НАЦИОНАЛЬНАЯ ДЕТСКАЯ
17 БИБЛИОТЕКА РЕСПУБЛИКИ КОМИ
им. С.Я.МАРШАКА
16490, г. Сыктывкар, Советская, 20

404540

Ме, вөлөм, сылысь кисö кылі,
Көр вольён менö тöбис кор,
И кöдзыд зэрысь бара ылö
Сэк нуис унлөн тэрыб борд.

Ме йöзлөн радейтöмнас шуда,
Пöсь муслун сьölöмысь оз ям.
О, кызди, кызди тэнö кужа
Благöслöвитны тöдтöм мам!

1959 во.

М. В. В. В. В. В.



Дорогие мои, сылысь кисö кылі,
Көр вольён менö тöбис кор,
И кöдзыд зэрысь бара ылö
Сэк нуис унлөн тэрыб борд.

Ме йöзлөн радейтöмнас шуда,
Пöсь муслун сьölöмысь оз ям.
О, кызди, кызди тэнö кужа
Благöслöвитны тöдтöм мам!

М. В. В. В. В. В.

Дорогие мои, сылысь кисö кылі,
Көр вольён менö тöбис кор,
И кöдзыд зэрысь бара ылö
Сэк нуис унлөн тэрыб борд.

404510

* * *

Небесати кодыр өтнас
Кокни кымөр кутас уйны,
Тэнө кыскас тувсов вөтнас
Куим верст пасьта Полууйыс*.

Кызд нө сылысь мичсө кужан
Сыланкывйө өні кыны?
Сөмын войвылын өд чужө
Татшөм ва да татшөм сынөд.

Ачыл бура сийөс төдан,
Мыйла татчө кыскө туйыс.
Коркө мөдарө мөй мөдас
Кывтны вынийөра Полууйыс?

1959 во.

* П о л у и ю — усьб Обь юө.

* * *

Ненец Олей оліс ыджыд нэм —
Окмысдас өкмыс во.
Комын кык внук öні сылөн эм,
Кувнысö оз и ков.

Кувны? Оз бертовтчы татшөм кыв,
Мортыд öд абу тюй...*
Ненецöс колльöдö сьыланкыв,
Визув, кыз Сяма ю**.

Туйö кө мөдөдчас пöрысь морт,
Паньяс на көра дадь.
Амдерма ылын, но миян ёрт —
Медпöрысь депутат.

Эм сылөн аслас и гаж, и шог,
Мучитö ыджыд дум:
Мыйла оз вайлыны выль кино,
Оз воы краснöй чум?

Ненец көть тундраысь лои дзор —
Овны да сьывны дась!
Важөн кө сийö эз вöвлы морт,
Öнi — Сöветскöй власти!

1953 во.

* Тюй — ненец кыв вылын морж.

** С я м а ю — усьö Баренцево мореö.

* * *

Ме радейта келавны тундраод, вөрөд,
Көть нэм чөжөн ни өти пөтка эг вилы.
Од войвылын некодлы мешайттөг төран
Кузь туйяссө вуджигөн кисьтыны ньылөм.

Мед лунвывса морелань кыссёны мукөд
Да ноксёны абутөм висьёмнас бара.
Мен вай аслад гөлиник шонділысь юкөн
Да зільлунтө йёзыдлысь, вунлывтөм Кара!*

Но шондіыс бара нин дыр кежлө кусі,
Куш тундрасө мореодз турөбыс толө.
Вот та вөсна войвывса йөзсө и мусө
Став сьөлөмсянь пөсьджыка радейтны колө.
1959 во.

* К а р а — Карскöй море берегын чери кыйысь-
яслөн посёлок.

* * *

Берег дорын шойчöны кунгасьяс,
Сувталісны якөр йылö радөн.
Некод сійöс, тödöмысь, эз пасйы,
Кыйсьысьяслөн кор воис бригада.

Узьö Кара

Ланьтöм море бердын,
Вötасигас никсалöны поньяс.
Омуль ректасны, и бара ылі эрдö
Петасны водз асыв тэрыб зоньяс.

Пöльтас лэчыд тöлыс кокни парус,
Сола ваён чужöмьясö резас.
Море сöмын удаллы да ярлы
Шыбитас кунгас тыр ловья эзысь.

Мыйён сэтчöс зоньясысь тэ омöль?
Уськөдчы тшötш накөд тöня шөрö,
Кöні сьökыд пökнас зэвтчöм омуль
Тыв пыдöсын дзирдалöмөн вөрö.

Рытнас пуксян чöскыд юква бердö,
Мудз, но шуда воан шоныд чумö.
Сьöd синкыма ненка тэнö вердас,
Козьныштас тшötш аслас гуся нюмөн.

1958 во.

* * *

Аргыш туйсө турөб өдйө толас,
Брунган шыыс регыд ланьтас чөв.
Тундра шөрө кольччыны кө полан,—
Кокни даддьө тәрмасьөмөн сөв.

Кузь да пемыд тані төвся войыс,
Харей кутны дыр оз велав ки.
Сийөн, гашкө, небесаыс койө,
Помся кисьтө уна рөма би.

Кодзув öзйылас да усигмозыс кусө,
Море весьтын орө сылөн нэм.
Коді веритас,—

и кодзувсө и мусө
Сизим лунөн вермис вөчны ен!

Синнад сюся пемыд йирас йиджтысь,
Харей-бедьтө лым толаө сүй.
Югыд Спутник,
Миян Спутник гижтө
Му шар гөгөр асьыс эзысь туй!

Чумсянь чумө лэбзьө ыджыд юөр,
Лэбачлөн кодь кокни сылөн борд.
... Небесалань чатөртыштөм юрөн
Войбыд дзоргө маличаа морт.

* * *

Кузь туйо мөдөдчан луно
Кито көть меным эн сет,
Кассаысь ньобны эг вунод
Оти перронной билет.

Войвыло тэрмасьо поезд,
Юргис нин коймод гудок.
Моросысь сьолөмөс сейо
Отнамөс колльодысь шог.
Пышйоны пожомъяс бөрө,
Дзирдыштлас ичотик ю,
Сидз, быттё помасьтөм вöрыс
Поездлы сетас салют.

Кöрт вöвлөн шы кындзи нинөм,
Кывзысь көть мыйта, он кыв...
Мен, гашкө, öвтö, со, кинас.
Туй боксянь ичотик ныв?

Серпасыс коли нин ылö,
Син водзысь сöмын оз быр...
Виччысьтөм бур сьыланкылөн
Сьолөмой чукöстчис пыр.

Медым көть нинөм эн шу тэ,
Колльодны весиг эн пет.

Тэ пыдди киясын нуа
Ковтөм перронной билет.

1959 во.

* * *

То кӧдзыд, то турӧб,
То помасьтӧм зэр,—
Оз овывлы бурӧн
Пай-Хой бердса эрд.

Но некодлысь жальлун
Да милӧсть оз кор
Гвардейскӧй медаля
Да сӧвика морт.

Горш кӧинлысь пиньяс
Мед жерйӧдлӧ вой,
Но рам кӧръяс дӧнысь
Оз вешйив Герой;

Оз пуксьыв, оз водлы,
Кӧть бушколыс лют...
Оз тӧд, юргӧ кодлы
Москвасянь салют!

• 1959 во.

ПОЖӨМ

Пашкыр юра пожөм
Эжва бердын шувгө,
Быттьө төв и гождөм
Код вылын кө увгө.
Сийө абу том нин,
Сирөн чорзис лолыс:
Некод оз нин помнит,
Кымын морт нэм олө.
Пыждөн кывтан-катан,
Ылі ягө мунаһ,—
Пожөм улын, татөн,
Шойчыштны он вунөд.
Орчөн Эжва пессьө,
Лиbö шывгө чөла.
Мудзөм мышкад пестер
Некор көть он көлав,
Кывзан, кыдзи вашкө,
Пожөм сёрни панө,
Казьтылө на, гашкө,
Перымса Степанөс.
Вит сө во нин бөрө
Сийө кадсянь коли,
Кодыр пемыд вөрүн
Рочөс аддзис коми.
Онi ставным сылы

Медбур аттьо сям,
Йозлы радлун выло
Ов, миян Россия,
Уна чой-вок динь
Медся шань да муса!
Дона чужанинон
Тэ он проста шусьы!
...Пожом важ моз нуо
Эжва вожын вахта:
Кыло — поезд муню,
Аддзо — кыпто шахта.
Югид спутник Мулон —
Выль советской кодзув —
Чолөм миян юлы
Ысто лэбигмозыс.
Регыд парма-эрдыс
Шызяс ыджыд горон:
Гызяс пожом бердын
Миян Коми море;
Эжва сетас кисо
Муса Волга-чойлы.
Югдас лыдтом бион
Миян ыджыд Войвыв!
Кывсян, майбыр, ылодз,
Миян Коми муой...
Та йылысь, дерт, сьылан,
Менам пожом пуой!

1958 во.

НЯНЬ

Юрбиттөг важ кадө
Сейны эг пуксьыв.
Порысь мам казтыліс
Сы йылысь мен,
Няньлөн быд крөшкиөн
Микөд пө юксьө
Гольяслысь мукасө
Терпитысь ен.
Крөшкиөн...
Эскыны енлы ог мөдөй,
Пызанным тыр
Небыд көрышөн век.
Шыбитны крөшкисө,—
Зэв бура төда,—
Му вылын медыджыд.
Медсьөкыд грек.
Паметьын ставыс өд:
Шогыс и тшыгыс.
Торъявлөм муяслөн
Векньыдик пом.
Чужи на сөмын,
А лои нин мыжа,
Бать-мамөй шуисны:
— Лишалысь вом!..
Мый найө көдзлісны?

Зэв сьökыд шуны.
Кöйдыс-ö? Синва-ö?
Прöста он бöрд!
Унатор вунö,
Но сійöс он вунöd:
Му пыдди сьölöмтö
Йирö важ гөр.
Лөглунөн пузьыліс
Вемыд и вирыд.
Бöрдисны ичötъяс:
Корисны нянь...
Мунлісны дядьöяс
Ылі Сибирö,
Сьöрсьыныс нулісны
Тасьті да пань.
Сісьтіс да сötіс
Кулак ассьыс сюсö,
Тшыглуныс джагöдны
Зіліс дзонь сикт.
...Ас синмөн аддзылі,
Кыдзи сэк уси
Нянь вöсна тышкасьысь
Смел коммунист...
Помнита гажа да
Шондіа тулыс:
Май вайис
Ыбъясö кывлытöм гор.
Петісны тошка йöз
Жугöдны мулысь
Морöссö петляөн
Зэлөдөм бор.
Кодъяскö полісны,
Кодлыкö дыр на
Жаль вöлі энөвтны

Омөлик поз.
Тадз мяян том дырйи
Олөмө пырис
Тшыглунсө повзёдлысь
Вына колхоз.
Уна лёк бушков пыр
Рөдина вуджис,
Тысяча пөв лои
Зумыд да ён.
Енсяньыс отсөгтөг
Зэв бура кужам
Оні ми висьтавны
Няньыслысь дон.

1957 во.

ДАС ÖТИ ЗОН ЙЫЛЫСЬ БАЛЛАДА

Сиктын быдмисны дас öти зон,
Быдөн на пövстысь статя да ён:
Куим Микол, кык Петыр да Миш,
Митипор, кык Егор да кык Гриш.
Öти пөрөдiс пармаын вөр,
Мöd зон радейтiс агас да гөр,
Коймöd весь овны сiдз жö эз куж,—
Быдөн ичötсянь радейтiс удж:
Куим Микол, кык Петыр да Миш,
Митипор, кык Егор да кык Гриш.
Воис зонъяслы гöтрасян кад,
Но лёк враг торкис олöмлысь лад;
Öти-мöd бөрся,— тöданныд он?—
Бойö мунiсны дас öти зон:
Куим Микол, кык Петыр да Миш,
Митипор, кык Егор да кык Гриш.
Шогсьö Эжвакöd тшötш чужан вөр:
Зонъяс гортаныс эз воны бөр,
Весиг висьтавны некод оз куж,
Кöни корсисны аслыныс гу:
Куим Микол, кык Петыр да Миш,
Митипор, кык Егор да кык Гриш.

Кыа сикт весьтас важысь на сэзь,
Пемыд кымөрлысь вуджөр оз лэдз.

Медым му вылын пыр вöлі мир,—
Найö сы вöсна кисьтисны вир:
Куим Микол, кык Петыр да Миш,
Митипор, кык Егор да кык Гриш.
Найöс казътывны кутасны нэм,
Паметь на йылысь кадыс оз вен.
Орччөн сувтисны,— аддзанныд он?—
Некор кувлытöм дас öти зон —
Куим Микол, кык Петыр да Миш,
Митипор, кык Егор да кык Гриш.

1959 во.

* * *

Колө жө чукөртны сэтшөм терпенье,
Билы мед вöлясö мортлысь не венны!

Ачым ме кыкысь нин вöлі салдатон,
Веськавлі му вылө шыбитөм адö.

Чарлаон вундигон идза кызд усьö,—
Морöсö пуляыс сатшкысьö гусьон.

Öти лун биыслы паныдөн овны,—
Куим нэм кокниджык колявны ловлы.

Чужим ми, тыдалö, зэв чорыд кадö...
Сы вöсна славитам мортлысь отвага!

1958 во.

КОПРАСЬО ДЗОРИДЗ

Лыйлісны дас коммунистӧс,
Дас гӧрд боецӧс-салдатӧс.
На йылысь кувлытӧм висътыс
Пыр кутас югдӧдны кадсӧ.
Медбӧръя лов шыӧдз тышас
Кӧсйисны водзсасъны найӧ.
Веськавны врагъяслӧн кытшӧ
Ставныслӧн вӧлӧма пайыс.
Кӧртавны синъяс эз корны,
Сувтісны даснаныс орччӧн.
Сывъясьӧм кияс эз орӧд
Белобандитъяслӧн ёрччӧм.
Вӧр весътын кыпӧдчысь шонді
Чӧвталіс зарниа сунис.
Муслуныс кулӧмысь ёнджык,
Аддзан кор кыпӧдчысь лунсӧ.
Тадз найӧ кулісны дасӧн
Вежӧдысь льӧм пуяс бердын,
Медым пыр мича да ясыд
Вӧлі выль войвывлӧн эрдыс.
Сэн, кӧні бушколыс дурліс,
Олӧмныс смельяслӧн ори,
Копрасьӧ лысваӧсь юрнас
Му вылын медмича дзоридз.

1956 во.

Коді медводз вöчис томан,—
Вöлі тöлка морт.
Колькъя томан öдзöс помын —
Медся вернöй ёрт.
Менам кöлуй абу уна —
Кык костюм, кык клёш,
Но кор уджавны ме муна,—
Пола, мед оз вош.
Складъяс öдзöсьясö иган
Лöсьöдам на ми,
Медым некытчö оз сибав
Гусясьысьлөн ки.
Тадзи му шар вылын вöлі
Лыдтöм уна во.
Но ме бура тöда öнi,—
Тадзи оз нин ло.
Нэм джын қоляс, гашкö, зэв нин,—
Воас сэтшöм кад,—
Томан нуасны музейö,
Восьса лоö склад.
Бательсь юалас сэк пиыс
Ковтöм кöртлысь ним,
Кодöс важ витрина пиын
Кутас сёйны сiм.
Мед оз висьтав тайöс сылы...
Абу ыджыд шог!
Мед оз веськав мортлөн кывйö
Кольöм кадся ёг.

1957 во.

ЗЭР БӨРҮН

Киссё эзысь
Чераньвезысь,
Дугдiс вөрны
Кыз пу кор.
Көнкө ылын,
Одва кылө,
Сөмын мургө
Гымлөн гор.

Векни туйыс
Водзө уйө,
Тувсов сынөд
Быттьө ма.
Сөстөм шорысь
Эжва дорысь
Ошкамөшка
Юө ва.

Радлө лолыд:
Мунны долыд,
Абу сьөкыд,
Абу дыш!
Мыссьөм мусө,
Югыд юсө
Сывьяс босьтiс
Зарни кытш.



Εβρονα
2020



THE

OFFICE

OF THE

SECRETARY

OF THE

NAVY

AND

ARMY

[Faint, illegible handwritten text]



ДЗИРДАЛӨ МОРЕ



зирдалө море
Тöлыся войö,
Парус-пыж дорөдз
Югöрсö койö.

Шогсьö гитара
Сынысьлөн киас:
О, муса карöй,
Санта-Лючия!
Чöv олысь рейдын
Узьö Неаполь.
Янкилөн крейсер
Шыбитис якөр;
Код юра зоньяс
Юöны портас...
Висьтав, мадонна,
Көн налөн гортныс?
Зумыша дзоргö
Пöрысь Везувий,
Кымөр съöd борднас
Сы весътöд уйö.

Дзоньон да бурон
Сы бердысь муной.
Инасьгом юръяс
Одйоджык нуой.
Терпитас сийо,—
Виччысьтөг потас...
Тадз аслас бион
Помпея сотис!

1959 во.

ДОНЬОН ДА БУРОН



* * *

Коркө верма мөй вунөдны
дзик төдтөм нылөс,
Коді гусьөник бөрдіс
Стокгольм бердса портын?
Сійө сөрөн нин, тыдалө,
төдмаліс-кыліс,
Мый «Победа» корабль
бара веськөдчис гортлань.
Вөлі рыт. Сійө локтіс
эз өтнас, а кыкөн:
Ылі йөз муысь нылыслы
сюрөма верөс.
Важ пакгаузолн вевтланьыс
зэв ыджыд зыкөн
Пессис енэжысь уськөдөм
кунва кодь зэрыс.
Кодкө шыбитіс шайт
нывлөн нюжөдөм киө,
Көть эз вөв сійө миянысь
омөль ни, гөль ни.
Туйө миянөс колльөдіс
тысяча биөн
Эзысь морелань ляскысьөм
мича Стокгольмыс.
Ме эг юась, кыз сьөд синма
веськаліс татчө,

Мыйла эновтіс
батъыслысь, мамыслысь мусö.
Кувны лöсьöдчöм мортлысь моз
шог сöмын аддзи,
Кодöс некутшöм шуд
сылөн синмысь эз кусöд.
Еджыд каляяс горзисны —
дзайгисны гора,
Алöй выпелъяс качисны
мачтаяс йылö.
Кодыр мортыдлөн сьölöмыс
кык пельö орö,—
Сьökыд та йылысь висьтавны
мортлөн жö кылөн.
Восьса эрдъяслань бара ми
тöвзыны мöдiм,
Море нуис Стокгольм бердысь
миянöс ылö.
Уна шог, кодi сулывлö,
дыр кадөн пöдö,—
Чужан му вöсна шог
нывлысь нинöм оз ылöд.

1959 во.

* * *

«Соррентоö бөр лок.
Прөстита ставсö ме...»
Сьöd синма итальянка
Нора сьылö.
Ог гөгөрво ме:
Кутшöм вермис ен
И райын бөрдöдны
Да шогö вöйтны нылöс.
Тан збыльысь рай,
Кöть вөтласны,— он мун,
Пыр тэнö чуймöдöны
Небеса и море,
Везувийлөн оз паляв
Сьökыд ун,
Изида аслас морöс бердас
Корö.
А шондi кисьтö
Ассьыс зарни гож,
Оз кöдзав ньöти
Весиг рытья кадö,
Кор төврутөг
Оливалөн быд вож
И тöдтöм мортлы
Сьылö серенада.
Кöть öтчид аддзылан,

Он вунод сэсса нэм
Пось шонді улысь
Тайо мича мусо...
Но сөмын öнi
Гөгөрвои ме,
Ас чужан войвыв
Мыйла сэтшөм муса.

1959 во.

ВОЙНА ВЫЛЫН ВОШТИС ПИСӨ

Война вылын мамыс воштіс писө:
Вөйи либө сотчис порок-биын,
Некод сылы та йылысь эз висьтав...
Дас вит во нин курыд синва кисьтө.
Вермас өмөй коркө коньөр мамлөн
Морөс пытшкас сьөлөм дойыс ямны?
Откодьөсь өд найө...
Өні гижә,—
Шөгсьысь мамөс аддзылі Парижысь,
Сьөд чышьянсө коді эз на вежлы,
Кос вом дорыс кодлөн важөн едждіс.
Озырлуныс мамлөн вөлі киас,—
Куим доллар сулалөма пиыс!
Долларьясысь синва ёна сьөкыд.
Пычиктіс нин кодөс шудтөм рөкыс.
Чукөртны став синвасө кө, төда,
Война өзтысь сәні ачыс пөдас!

1959 во.

* * *

М. Пыстинлы

Аслад му дінө радейтөм
Төдны кө көсьян,—
Коркө өтчид көть
Сы дінысь ылөджык мун,
Медым юр весьтад
Мөд кодзув öзйылас-өзьяс
Да оз мян кодь кьяөн
Кыпөдчы лун.
Скөр Бискайскöй залив шөрын
Увгöны гыяс,
Войлөн пемыдыс гуын кодь
Сьökыд да сьөд.
Гажтөм синьяснад
Мый ылі енэжысь кыян,
Гашкө, думайтан,
Ме тэнсьыд мөвптө ог-төд?
Тайö дзирдыштлис
Син пөвнас тыдавтөм бакан,
Пиренейскöй скалаяслысь
Эрдөдліс грөз.
Долорес Ибаррурилысь
Гөлөссө татөн

Гусьон кывзöны
Шудлунсö аддзывтöм йöз.
Тані синваысь пöльтчöны
Сейфъяс да банкъяс,
Коді озыр — кöзяин,
А гöльдзык кö — раб.
Татчö вайö оз вöля,
А выль сикас танкъяс
Океансайса флаг улын
Локтысь корабль.
Но и тані тшöтш
Миян кодь кодзулыс чужас,
Тырмас быдöнлы
Муывса радлун и шуд.
Пиренейскöй скалаяслөн
Вошлывтöм вуджөр
Кыптысь шондисö вевттьыны
Некор оз куж!

1959 во.

ЦЕР-ЛАШЕЗ

Коммунаръяслөн стен бердын нэр катшасинъяс,
Быттьö дзоргöны ме вылö кельдыштöм синъяс.
Дзеба лов шыöс. Копырта на весьтын юрöс.
Коммунаръяслөн стен...

Пуля гижтöма вурыс...

Тані узьö Гаврош, узьö садьмывтöм унмөн,
Узьö ичöt Гаврош, узьö первой Коммуна,
Коді öзйыліс му весьтын ярьюгид биөн,
Кодöс лыйлісны тьеръяслөн гырдодöм кияс.
Коммунаръяслөн стенискöд дзик орчöн вöйи
Маутхаузен лагерысь чукöртöм пöим.

Татшöм пöимсö некод эз аддзывлы нэмас —
Кыксё тысяча мортлөн сэн вирыс и вемыс.
Гашкö, шог вöсна дзоридзьяс лоины вижöсь?
Гашкö, сьыланкыв талун эз юргы Парижын?
Некод сотны Коммунасö эз вермы биөн, —
Мулысь джынсö нин сывъяліс-югдöдіс сійö.
Видзöд, Эйфельысь вылөджык кыпöдчöм

вуджөр

Коммунаръяслөн стен бердсянь водзö пыр

вуджö!

1959 во.

СЫЛАНКЫВ

О, кыдзи нө та йылысь
Висьталан кывйөн:
Став мореыс веськаліс
Тöлысьлөн сывйö,
Пыр тіралö, дзирдалö,
Синъястö ёрö,
Роч сыланкыв миянлы
Сьылö синьора!
А лунвивса вой
Сэтшöм долыд да кыпид,
Кöть комиөн тшöтш
«Югыд кодзувтö» кыпöд,
Но сыланкыв тэныд ми
Отвылысь сиами,
Пöсь шондi мөз дзирдалысь,
Муса Россия!
Корабль мунö Каприлань
Неыджыд öдөн,
Кöть ва туйсö важөн нин
Зэв бура тöдö,
А сыланкыв юргö
Пыр ёнджыка, гора;
Синьора синьорöс тшöтш
Ас дінас корö,
Неапольса докерьяс

Сувтöны кытшö...
О, сьыланкыв, кодöс тэ,
Кодöс он ышöд!
Ме аддзылі лунвивса
Войыслысь мичсö,
Кор мөвпъясыс быдöнлөн
Öтлаö йитчö,
И некор ог вунöдлы
Сывъясьöm кияс...
Тэ со кутшöм вölöмыд,
Миян Россия!

1959 во.

СЁРНИТЁ НИКОЛАС ГИЛЬЕН

*Ах, Куба, тебя я знаю!
На крови растут твои пальмы...*

(Н. Гильен)

Кывлі, свет вылын эм сэтшөм дыс.
Көні муыс и ваыс тшөтш дон.
Гашкө, югыд Колоннойсянь сійөн
Ассьыс шондисө аддзис Гильен.
Төдтөм сёрни кыз музыка юргө.
Лов шы дзевисны тысяча морт.
— Камарадес!..
Испанскöй ног — другъяс,
А кубинецъяс кыв вылын — ёрт.
— Камарадес...
И музыка орө,
Бөрдө лөз океаныслөн гы,
Быттё бара нин йөз берег дорө
Нуө рабөс пиратъяслөн пыж.
Нефть да олово перйыны сэтысь,
Сэсся сгинитны тшыгысла мед.
Татшөм сир курыд шуд Новöй Светысь
Аддзис аслыс съод кучика негр.
— Ой, Куба, тәнө тöда, ме тöда,
Он селитраөн славитчы тэ:
Дыр Испания миянөс пöдтис,
Янки нёняліс миянлысь вем.

Кöни правдаыс му вылын? Найö,
Кодъяс юисны миянлысь вир,
Онi атомöн, ыджыд войнаөн
Дасьöсь сотны нин йöз костысь мир.
Гөлöс чорзёö... Оз бöрд и оз норась,
Вывлань клятва моз кыпалö ки:
— Камарадес...

Оз тöдны Нью-Йоркын,
Кыдзи керкаяс нбылалö би,
Кыдзи сотöны мусö напалмөн,
Эз на аддзывны кагалысь шой.
Налы колö, мед вуджөр быд пальмалөн
Хиросималысь казтыліс вой.
Но ог сетöй ми жуглыны каръяс,
Торкны мирлысь да дружбалысь шуд.
Став народъяслысь öтувтöм ярлун
И Нью-Йорклөн оз кут чорыд грунт...

Чöла тiпкöны тысяча сьölöм,
Сöмын сёрнитö öтнас поэт,
И Колоннойсяньсылөн смел гөлöс
Война öзтысьлы узыны оз сет.

1955 во.



Свѣтомын
муслун



ТУРИЯС ЛЭБӨНЫ БАРА



урияс лэбөны бара,
Горзөмыс кылө зэв нор.
Ошиньö зумыштчөм арыс
Шыбитис вижөдөм кор.

Жаль кольөм гожөмыс пыр на,
Бергөдны сийөс оз позь.
Төв йылын ньөжйөнник сырмө
Пужъялөм лапьяса коз.

Төв еджыд турөбнас воас,
Тыртас быд ордым да чой.
Көсьян — он көсийы, а ковмас
Кывзыны пыр өти мойд.

Кедзовтны ас чужан мусö
Оз вермы радейтысь морт,
Весиг и туриөс кутö
Му вылын дзик өти горт.

Тулыслысь лов шы кор кылас
Лым улысь мездысьöm вөр,
Гора да збой сьыланкывйөн
Турияс локтасны бөр.

На кодь жö шуд сöмын кора
Аслым и челядьлы ме:
Муслунсö чужан му дорö
Нинöm мед мөдтор оз вен.

1959 во.

* * *

Нимлунӧс пасйыны ме ордӧ кеж,
Дзик нинӧм сьӧрсьыд эн вай.
Ертӧс став му вылас нинӧм оз веж,
Другӧс оз ньӧб зарни шайт.

Вокъяс моз пуксям да казтыштам ми
Бӧрӧ нин кылалӧм лун,
Кор автоматъясысь вувзьысьӧм би
Вундываліс дженъыдик ун.

Мортыдлӧн зэв пыдын поздысьӧ лов.
Шонтывліс сійӧс и лым...
Дзебсьыны талун блиндажӧ оз ков,—
Мед юргӧ тулысья гым!

Збыльысь кӧ гымыштас...
Нинӧм эн шу,
Сувт командарм бердӧ чӧв;
Сійӧс, код вӧрзьӧдас миянлысь му,
Чышкыштас вынйӧра тӧв.

Киясным вӧчлісны быд сикас удж,
Кисьтлім и ньылӧм, и вир.
Му вылын кокниа некор оз чуж
Шондіысь сӧстӧмджык Мир!

1949 во.

* * *

Пуяслысь вижөдөм коръяс
Көдзө асфальт ыло ар.
Сьолөмөс некод оз торйөд
Тэысь, рөднөй Сыктивкар.

Эм тэнад серпасад вунтөм
Войвывлөн аснога мич:
Пармалөн төрытъя думыс,
Шондилөн талунъя дзирд.

Биясөн кытшалөм скверын
Тополькөд сывъясис ньыв,
Юралө том йөзлөн серам,
Кылө Куратовлөн кыв.

Отвылысь накөд ме сыыла,
Ошка и турөб и зэр.
Тэ весьтын паськаліс ыло
Енэжлөн кодзулөсь эрд.

Муслунөс тэ динө восьтны
Мичаджык кывъяс ог корсь.
Радейта...
Кылысь ог соссы
Тэ кодь жө шудлуна морт.

1957 во.

* * *

Бусын пыста дыр кө пессё,
Кыпөдчыны джыдж оз вермы,
Регыд миян ыбъяс весьтө
Кымөр локтас шоныд зэрөн.

Медым зэрө!
Ме ог пышйы,
Ог кут корсьны паськыд лэбув.
Кызлөн веж кудриа чышьян,
Гашкө, зэрсьыс менө дзебас.

Кымөр оз кө суөд туйын,
Кутшөм мичлун сэсся ошкан?
Со нин бара васө юө
Эзысь шорысь өшкамөшка.

Ыджыд йөрын быд нэр петас
Вывлань лэптис чалльөсь кисө.
Кыз пу улысь ме тшөтш пета
Му и ва благөслөвитны.

Унджык нянь да унджык турун
Зэрыс сьөрсьыс медым ваяс,
Медым быдөн олас бура
Миян югыд, ыджыд крайын.

Муыс оз кө ёна косьмы,
Быдмөг оз ло кельдыжжөн.
Дөрөм юрийыв ассьым восьта,
Медым зэрыс лолөдз йиджас!

1958 во.



Калялысь бөрдөмсө некод оз радейт.
Весьшөрө норасьö скөр Эжва весьтын!
Код сійөс корис лөз мореяс сайысь,
Ю сылөн бордяслы вывтi кö дзескыд?

Смельясöс Эжваным некор оз повзбөд.
Пыж бердын пессьоны медым веж гыяс!
Медмича сыланкыв сьолöмын ловзяс
Ва весьтын омлялысь бушковлөн шыяс.

1957 во.

* * *

Ой тэ, лөнъ да шоныд вой,
Баканъяслөн бияс,
Мырддис сьолёмысь спокой
Лөз Печора миян.

Керös йылын ворсö гудök,

Кывтö ылö мелі шы.

Бакан öзталысь зэв шуда,

Орчөн пукалö кор ныв.

Кывтас еджыд теплоход

Перекачъяс вомөн.

Мыйла, виччысьтём любов,

Бөрйин татшём томös?

Асьявылыс вошлас зон

Аслас карбас-пыжөн.

Мыйла менösö оз босьт.

Мыйён лон мыжа?

Ой, Печора, эзысь ю,

Баканъяслөн бияс,

Медым тэ кодъ югыд туй

Водзын лоö миян.

Керös йылын ворсö гудök,

Ылö кывтö мелі шы.

Бакан öзталысьлысь шудсö

Нэм чöж кутас юкны ныв.

1956 во.

* * *

Медся сьökыд сәки овны,
Кодыр йöзлы он кут ковны,
Ин он аддзы,
Шуд он аддзы,
Ёрткөд паныдасьны яндзим.
Весиг югыд тувсов шондi
Аслас югöрнас оз шонты.
Йöзлы муса сöмын сийö,
Кодлөн сьөлөм öзийö биөн,
Кодi удж вылө и тышö
Мунö веськыда, оз кытшовт.
Висьтав ачyd öни стöча,
Мый да кодлы бурсö вöчан,
Кыдзи гöран,
Кыдзи ытшкан,
Коркö пöсявлө-ö мышкыд?
Асьтö он кө сьöктöд уджөн,
Кыдзи тöдан мөдлысь мужа?

Медся сьökыд сәки овны,
Кодыр йöзлы он кут ковны!

1959 во.

* * *

Радейта тыяс да юяс,
Пармаысь быд ичот шор,
Неуна жугыльтчөм пуяс.
Паськөмсö вежоны кор.
Ог тэрмась самавны вугыр,
Чөвлунсö валысь ог торк,
Шондiлөн медбөрья югөр
Син улысь кытчөдз оз ор.
Водзтi кө ошкывлi тулыс,
Онi ме радейта ар,
Морт моз жö мудзыштöм юыс.
Абу көть важкодъыс яр.
Кымөрьяс сунисны йирö,
Ва вывтi кывтöны чöv.
Сьөлөмөс гусьöник йирö
Кутшөмкö виччысьтöм мөвл.
Кывтö и томлунöй бөрö,
Матысмö олөмлөн пом...
Медым жö юыс и вöрыс
Пыр кольö мича да том!

1958 во.

* * *

Неуна кынмыштлө, неуна сылө,
Енэжыс ыркыд да сэзь.
Коді нө тэнө, сьод синкыма нылөй,
Рытйысьны талун оз лэдз?

Верба нин,— аддзылі,— ва дорын потіс,
Вөрзбыліс туй бердын шор.
Сьөлөмөс виччысьтөг доймытөдз сотіс
Тулыслөн медводдза гор.

Узян кө, гудөкөн тэнө ог пальөд,
Сикт кузя прөйдита чөв.
Мудзөм дояркалысь ме моз оз жалит
Окыштны чужөмсө төв.

Кодзувъяс кутісны кельдөдны-кусны,
Шөйта ме пыр өтнам дзик.
Свет вылын тэ медся дона да муса,
Кыаөн мичмөдөм сикт!

1957 во.

ЗАРАВА

Туис тыр зарава лэччөді вöрысь,
Зэв ыджыд кыз пуысь вийöдi сийöс.
Видлы жö, кызиджык кажитчас, пийö,
Пу вылысь исковтöм синвалöн көрыс?

Жалиттөг дойдi ме кыз пусö черөн,
Сийö — эз ёр менö, весиг эз вөрзъыв,
Сöмын тай ас ногыс гусьöник бöрддзис,
Тусö синваыс гылалiс шерөн.

Бöрынджык унаысь дум вылö усьлi
Кыз вылын бурдыштöм раналөн туйыс.
Тыртöм пыр сулалö зарава туис.
Некодкөд сийөн ме öнi ог юксы.

1957 во.

* * *

В. Савинлы

Чужис-быдмис съод вөр шөрүн,
Деревняысь петіс,
Новліс чорыд сера дөрөм,
Визя гач да коти.

Арын пемыд, кодзыд войо
Тшына пеша дорын,
Ассыс шогсө, йозлысь дойсө
Сьолөмсянныс ерис.

Парма весьтын шуштөм кадыс
Кодыр вешйис ыло,
Сийо медводз шуд да радлун
Чужан кылөн сьыліс.

Они сөстөм енэж улын
Кывтө тэрыб олөм.
Сылөн сьыланкыв оз кувлы,
Ас пыддиыс олө.

1959 во.

РАДЕЙТИ-НАДЕЙТЧИ*

(ШУТОЧНОЎ СЪЫЛАНКЫВ)

Югыд төлысь небесати кывтіс,
Кор ме мөдысь паныдаси нывкөд.

П р и п е в:

Кыдзи и быд зон
Ме радейті,
Кыдзи и быд том
Ме надейтчи.

Сөмын көсйи заводитны сёрни,
Нылыс шуис: талун, зонмөй, сёр нин...

П р и п е в.

Эз тай висьтав зарни чарла-төлысь:
Вежон мысти, кывсьө, свадьба-көлысь.

П р и п е в.

Мөд морт меысь мусаджык да матыс
Тайө нывлөн көнкө вөлөма тай.

П р и п е в:

Кыдзи и быд зон
Ме радейті,
Кыдзи и быд том
Ме надейтчи.

1958 во.

* Гижөма өтвылысь Ю. Васютовкөд.

* * *

Озырлункөд ме ог чайт
Овны ыджыд ладын:
Зептын весиг өти шайт
Талун менам абу.

Мыйла колө пөжны шог,
Деньга йылысь кайтны,
Ачымөс кор дзик быд морт
Шуө дона шайтөн?

Меным деньгаысь оз ков
Дорны зарни порсьос,
А вот медмича любов
Тулысбыд ме корся.

Муна удж вылө кор ме,
Муна да пыр сьыла,
Медым эськө сетис ен
Ас кодь лэчыл нылөс.

Лөсьыл овны сөмын сэк,
Эм кор муса ёртыд...
Гашкө, медся озыр ме
Му шар вылас мортыс!

1958 во.

* * *

Мед, колөк, шуоны быдөн,
Ме пö зэв раминик ныв.
Кодлысь нö сьөлөм оз ышөд
Тулыслөн вашкөдчан шы?

П р и п е в:

Бара нин дөзмөдчө гудөк,
Кодөскө чуксалө дыр...
Мыйла ме рыт помсö кута
Откөн дзик пукавны пыр?

Муслун кө сьөлөмад усяс,
Нинөмөн сийөс он вен.
Отиөс радейта гусьөн,
Мукөдлы нюмъяла ме.

П р и п е в.

Олөмөй мича да югыд,
Тулысыс ышөдө лов.
Пöрысьлы, гашкө, и узьсьö,
Томъясöс кыскө любов!

П р и п е в.

1958 во.

* * *

Өвтчө өшинь улын
Веж кудриа пожом,
Откодъ сылы тулыс,
Көдзыд төв, көть гожом.

Сөмын менам сьөлөм
Тулысланьын нормө,
Ассьыс муса пөвсө
Виччысьны оз вермы.

Рыгтявылын кыа
Ньөжйөникөн кусө.
Мыйла нө оз шыась,
Коді сэтшөм муса?

1957 во.

* * *

Эжва весьтын кодзув моз
Озйис ылыс би.

Мича еджыд дзоридзөн
Льём пу мыччис ки.

Тайё, мусаёй, тэн
Сывсё восьтис тулыс.
Эн, эн мун, нылёй, тэ,
Неуна көть сулышт.

Миян ыджыд запаньын
Юргө кыпыд удж.
Оти сёрни панны ме
Некыдз тай ог куж.

Мыйла нё он отсав тэ
Кыны сёрни пом,
Кодёс дыр нин корсьысьö
Запаньса том зон.

Тайё, мусаёй, тэн
Сывсё восьтис тулыс.
Эн, эн мун, нылёй, тэ,
Неуна көть сулышт.

1958 во.

* * *

Тöлыськöд орччөн
Дзирдалö кодзув.
Кодöс ме корся
Лöнь асывводзöдз?

Сьöлөмöй, ланьтышт,
Эн сэсся кыскы
Сэтчö, көн анькытш
Лысваён мыссьö.

Шань да зэв мича,
Шудлуннас озыр,
Менö оз виччысь
Сьöd синма кодзув.

Гудököй прöстэ
Чуксасьö-корö,
Ланьтöм сикт весьтын
Шы сьлөн орö.

Тöлысьыс петлас,
Кымөрö пырас...
Кöни тэ ветлан,
Вунлывтöм нылöй?

1958 во.

* * *

Мыйла ассьыд вежөр, ассьыд эбös
Гусьöникөн йöзысь пыдö дзебан?

Озыр сійö,

кодi шöри юкö нянь,

Медся бöрын босьтö аслыс пань,
Бипур бердö водö медся дорö,
Томджык вылö некор дзик оз горöd.

Озыр сійö,

кодi тödö мöдлысь шог,

Висьтавтөг на аддзö сылысь мог,
Кокньöдыштны мукödъясös кужö
Пельпом вылас босьтём сьökыд уджөн.

Озыр сійö,

кодi тышкасиг оз пов

Ерт пыддиыс сетны ассьыс лов,
Данко моз жö перъяс ассьыс сьölём,
Югдöдны мед йöзлы шуда олём.

Мыйла ассьыд вежөр, ассьыд эбös
Гусьöникөн йöзысь пыдö дзебан?

1959 во.

* * *

Эн верит некор сылы,
Код асьсө помся ошкө,
Мед өтнас коз пу йылысь
Пыр кыйö еджыд ошкөс.

Эн верит сылы, кодi
Пыр тэ гөгөрджык гартчö;
Мед паськыд синма ёдi
Мөд тыкөлаö варччö.

Но эскыны пыр колö
Да сетны китö сылы,
Код шочаджыка волö
Да этша изö кылөн.

1958 во.

* * *

Ми ставным вöлим коркö томöсь,
Эг төдлöй төждысьöм да мудз,
И миян вöсна вöлöсть помын
Сёр войöдз уна ныв эз узь.

Но вояс кылалісны важөн,
Оз во нин мусукасян кад.
Од мукöд ныв-зонъяслөн гажөн
Сикт помын юргö кыпыд сад.

Кöть гуся завидь сьöлөм йирö,
Но йöзысь унджык шуд оз ков.
Лөз енэж улын олöй мирөн
Том йöзлөн дружба да любов!

1959 во.

ТӨВСЯ МОЙД

Он аддзы ни өти ордым,
Нинём оз торк вөрлысь чөв.
Юсьяслысь кокньыдик бордьяс
Ошліс быд пу вылө төв.

Лов шытө ассьыд көть дзебан,
Сьөлөмлөн тіпкөм оз кус...
Кысянькө лэбө и лэбө
Синкымад эзысь кодь бус.

Ичөтөн кывлывлөм мойдыс
Паметьысь эз өд на вун:
Жаль весиг сьылөмөн дойдны
Пармалысь төвпомся ун.

Пожөмын дзирдыштас кья,
Повзьодас ягыслысь вөт.
...Тракторлөн матыстчысь шыыс
Казьтыштас олөмлысь өд.

1959 во.

ДЗОРИДЗЬЯС ÖВТÖНЫ ЮРНАС

Дзоридзьяс öвтöны юрнас,
Ытшкысьлы шуöны: чолöм!
Лысваöн киськалöм турун
Косаöн кокниа орö.

Мунны да пыр эськö сьывны
Помасьтöм тайö покосöд,
Кыалöн медбөръя сывйыс
Туй вылысь кытчöдз оз косöд.

Висьталöй, дзоридзьяс, меным,
Кыз тайö виччысьтөг артмис,—
Морöсысь дыр кезлö венлис
Муслунöс зэв ылыс карыс?

Ме абу рöдвужтöм олысь,—
Лов пытшкысь тайöс öд кыла:
Видз вылын юралысь йöла
Сьөлöмын ланьтлывтөг сьылö.

Öнi ме век кезлö тiкöд,
Нинöм нин сэсся оз косöд...
Чужöны медмича стихъяс,
Мунан кор паськыд покосöд!

1958 во

* * *

Ва дорын шогсьö да норасьö истан...
Пароход сувтліс да эновтіс пристань,
Быттьöкö нарoшнö тувöстліс нельысь,
Кодöскö торйöдіс, кодöскö коліс.

Вавывса ордымыд öдйö тай сылö...
Кодлы нö öвтан лөз чышъяннад, нылöй?
Чойыдлы? Вокыдлы?
Гашкö нö, ёртлы,
Пароход тшыныскöд ылысмöм мортлы?

Медым ог тöд ме ни тэнö, ни сійöс,—
Пристаньялань гусьöник öвтыштi киөн;
Медым эн тöдлы и медым эн казаяв,
Мый вöсна менам тшöтш син дорöй вазис.

Сы йылысь некодлы оз висьтав истан,
Кымынöс йитіс да торйöдіс пристань...

1959 во.

* * *

Көкис позтөм көкыс
Вывті курыд шог:
Ылі туйысь милөйөй
Ме динө эз лок.
Оз висьтавы ёльяс,
Оз висьтав съод вөр,
Удал зонкөд кор нин
Отлаасям бөр.

Юасьө пыр менсьым
Аслам дона вок,
Төдны көсйө мамөй
Менсьым гуся шог.
Турияслөн бара
Кылө сёрни-шы,
Сөмын муса йылысь
Нинөмтор оз кыв.

Некод менсьым съөлөмөс
Дивитны оз кут,
Көдзавны кө ас кежас
Та дыра оз куж.
Медым көкыс лыддьө,
Кымын водзын во,—
Воясөн оз муртавы
Миянлысь любов.

1956 во.

* * *

Радейтис нылӧс том зон,
Ачыс кӧть сийӧс эз тӧд:
Керкалысь важиник пос
Важӧн нин тӧдмаліс мӧд.

Мед сийӧ мича да том,
Помаліс кык институт.
Шогсьыны ныв вӧсна зон
Садь быртӧдз ачыс эз кут.

Му вылын кыаысь водз
Виччысьӧ сийӧс выль удж.
Этатшӧм зонлы колхоз
Гӧтырпу корсьны оз куж!

1956 во.

* * *

Оз узьсьы, коть синъясос перъяв
Да нитш улö жалиттөг койышт;
Од войвывса шондiыс вермö
Пось югöрсö резны и войын.

Оз узьсьы...
А мекöд со орчöн,—
Кузь туйысь пö воöма тöрыт,—
Мöд морт сьökыд ун йывсянь ёрччö
Да пыр нинöм абусö сөрö.

Но садьмас да нопъясяс бара,
Сьöд пармаö дыр кежлö вошас,
И зэв сьökыд туйысь сёр арын
Посёлокö локтас кузь тоша.

Мед төдöны челядьным миян,
Кыз нэм кежлö радейтöм йиджö,
Роч сьөлöма морт йылысь сийөн
Ме узьсьытöм войясö гижа.

И пыр, кызди дзирдалö шондi,
Да му вывсö дзоридзён кöдзö,
Быд кывбурён мынтыны понда
Роч мортыслы мынлывтöм водзöс.

ТУВСОВ СЕРПАС

Енэж сөстөм нюмнас томмис,
Шонді кутіс дырджык койтны,
Сөмын керка жөлөб помыс
Кисьтө ассыс синва войтьяс.

Еджыд шебрас визув юлысь
Лэчыд борднас сырчик кырас.
Тадзи миян мирной тулыс
Мортлы сьөлөм пытшкас пырас.

1960 во.

* * *

Лым улын Яреньга чөскыда узьö,
Сы бердын ланьтöма вөр.
Тöлысьлысь зарни ордымсö вуджö
Отнас кузь сюръяса көр.

Важмыштöм кушникын зэв гора сёрни
Пальöдö синъясысь ун.
Мед көть посёлокас кутасны корны,—
Некытчö татысь ог мун.



Ичöтсянь тöдса мен Удора вөлök —
Сё комын верст пасьта нюр.
Эз öд дзык öтчыдысь подөн да вөлөн
Коркө сэт прöйдитны сюр.

Мукöдкөд тшöтш ёрлі васö и мусö,
Мудзыслысь веськалём пай.
Та вöсна, тыдалö, мусаысь-муса
Кушникын пузьöдём чай.

Водзджык кө унатор адззывны кужи,—
Жалитны некор ог кут...
Яреньга пос вывтi, кыла, кыз вуджö
Войвылö тövзьысь маршрут.



Тотчас





МАШУЪ

Лирической поэма

I

Син бердад зэв уна чукыр,
Юрсиыд пöимысь дзор.
Уна тэ аддзылн мука,
Кисьтн пöсь синвалысь шор.
Гöтырөн вöлн и мамөн,
Сэссия салдаткаөн тэ.
Дöвалөн вежөрөн-сямөн
Важөн нин колльöдан нэм.
Верöсыд кодарын уси,—
Та йылысь юөр эз сет.
Син водзад пыр öткодь муса
Ошалö сылөн портрет.
Пи öнн велöдчö ылын,
Висьталан, бура,
«На пять»...
Ассьыс сьöd синкымъяс сылы
Кольöма мунигас бать.
Кажитчö, ставсö, мый тöдн,

Нывбаба, тэ йылысь ме,
Гижны поэмаын мөді
Сідз, кызди вөлі и эм.
Ньöти ог содтав, ог чинтав,—
Сы вылө оз кыпав ки.
Тэнсьыд, салдаткалысь, нимтö
Некор ог вунөдöй ми.

II

Машук,
Веж кудриа Машук,
Кутшөм тэ визув да збой!
Висьтав вай: код вöсна Сашыд
Эз узылы сы мында вой?
Отвылысь казътыштам сійöс...
Кунес ю...
Векныдик пос.
Эн öмöй первойысь киад
Тшöтш сэки багыртö босьт?
Ставным öд неуна полім:
Кунесным вөлі зэв яр.
Сашököд кызьöд во олім,
Тэ — дас көкъямысöд ар.
Пуръясьны куимөн кайим,
Кылöдны яг вылысь вөр.
Первойысь аддзин, кызд ваыс
Ойдöдіс зэв паськыд сьöрт;
Первойысь ю весьтö сувтін,
Повзин да горөдін:
— Ой!..
Кажитчö, сэк пожөм увсянь
Медводз тэн нюжөді сой.
Сэсса лөнъ запаньялань кывтім,
Вунөдлім сөйөм и ун;

Кватитчам: яр Кунес вывті
Бара нин восьлалө лун!
Зільлунсө сетлөма енмыс,
Шулісны, Машукөй, тэн.
(Ичөтсянь чөртлы да енлы
Некор эн эскывлы, эн!)
Багыр көть чер тэнад кыин —
Отмоза ворсісны пыр...
Зонъяслөн, шуам, и сійөн
Шудлунөн сьөлөмыс тыр,—
Орччөн кө восьлалө нылыс,
Сэк жө, зэв варов да шань...

Кык зонмөс сэк, өти кывйөн,
Торйөдіс сьөд бөжа кань.

Сашө моз некод эз кужлы
Гудөкөн ворсыштны вальс.
Завидьлун сьөлөмын чужліс
Сы вылө видзөдіг.
Жаль,
Том кадыд мөдысь оз волы!
Сьөлөмад абу кө дой,
Удж бөрын мыйла нө колө
Пос вылын виччысьны вой?
Гудөк пыр ворсө и ворсө,
Юргө Амур йылысь вальс.
Виччысьтөг
Веж льөм пу дорсянь
Вуджөртис кельыдлөз шаль.
Морөсө йөршитчөм пыста
Пессьөмысь некыдз оз ланьт.
— Мыйла нө коран?
Пыр кыскан...
— Сёрнитам, Машукөй...

— Шань!

Матыстчис.

Видзөдліс синмө,

Стрөга, кызд видзөдлас чой.

Первойысь сьөлөмө инмис

Помөдзыс төдмавтөм дой.

— Сашөөс прөста эн кедзовт...

Кыкнанныд өткодьөсь мен...

Син весьтас шаль помсө лэдзис,

Ньөжйөник ышловзис:

— Эн!..

Сьөлөмлы некор он тшөкты

Бөрийыны кык пөлөс шуд...

Мунам тась...

Мыйла он йөкты?

Водз бара кыпөдас удж...

Сет сөмын кыв,

Медым Сашыд

Миянлысь сёрни оз төд...

Кылі ме: мусмөма Машлы

Ме серти ёнджыка мөд...

Кывтісны комынөд вояс,

Му вылын вөвлытөм кад!

Миянкөд котөртны войын

Нывбаба вөлі тшөтш рад

Ю бердө,

запаньө,

вөрө,—

Веськавліс көні прорыв.

Некор эз кольччывлы бөрө

Кельыдлөз синъяса ныв.

Томъяслөн сьыланкыв шыөн

Юраліс-гыаліс яг,

Шонді моз дзирдаліс вылын
Мөд пятилеткалөн флаг.
Кунесын өтчюд ме сёрми,—
Ёртъясысь торъявлі сэк,—
Кытыськө веськалөм сёрни
Төдсаяс вайисны:
— Эк!

Воштін тэ этатшөм нылөс!
Нюжмасин, тыдалө, дыр...
Тайөс ме сьөлөмөн кылі:
Он тай ло мусанад мырд!
Ачымөс дивита пыр на,
Ёрт водзын мыжөс ог дзеб.
Завидь, кор сьөлөмтө кырө,
Делөыс овлывлө жеб.
Свадьбуйтны сідз жө эг эшты...
Бөрынджык казътыліс Сан:
— Виччысис тэнө невеста,
Кельыдлөз синъяса Маш...

III

Чөв ланьтіс Сашөлөн гудөк...
Сійөс ті төданныд он,
Мый лоө,
Оз кө пет лудйө
Гаж панны медваров зон?
Мый сылы томъяслөн гажөдз?
Гөтыра мортыдлысь мөвл
Дугдіс нин кыскыны важөн
Томлунтө ышөдысь төв.
Ме сөмын йөйталі дыр на...
Мый сәки корси? Ог төд...
Нылыс и меным өд тырмис
Машысь не омөльджык мөд,

Сөмын эз ло мейсь верөс,
Сашө кодь төждысьысь бать...
Быттьөкө сөтисны черөн
Сьөлөмысь кутшөмкө прать,
Муслункөд коді на йитліс
Менсьым и олөм и лов...
Сашөлысь жугөдіс Гитлер
Ныв дінө сөстөм любов.
Ми быдмим асланым киөн
Мичмөдны батьяслысь му,
Мукөдлөн ми кодь жө пиян
Быдмисны сотны да вины,
Вир кисьтны пыдөстөм ю.
Со кызди шудлуныд орө...
Төд сылысь зэв ыджыд дон!
Нопьясөн тэрмасигсорөн
Лэччим ми дас куим зон
Пристаньө.

Вөлі и Сашө

Ми пөвстын — гөтыра морт.
Ёсь емөн сьөлөмө сатшис
Синва да бөрдөмлөн гор.
Нэмъяс чөж вөлөма тадзи:
Кыптас кө му вылын кось,
Гөтыр да мам медводз аддзас,
Пулялөн йыв кутшөм ёсь.
Машө эз бөрд.
Быттьө кынмис
Синвалөн медводдза войт,
Сьөлөмас көть вөлі джыныйис
Вирыскөд сорлассьөм дой.
Окаліс Сашөос. Меным
Нюжөдліс тіралан ки.
Шуи сэк:— Вөрөгөс венны.

Машукöй, благöслöвит...
Паметьысь некор нин сійö
Сьöкыд, кузь туйын эз сыв:
Тадзи сэк ачыс Россия
Колльöдiс пиянсö биö,
Мам моз жö нюждöдiс сыв.

IV

Зэв ньöжйö кылалö гожöм,
Нöшта на ньöжйöджык төв.
Сикт бердын зумыштчöм пожöм
Ланьтöма, сулалö чöв.
Колисны ичöt да пöрысь...
Мый кужан думайт да вöч!
Пемыдсянь пемыдöдз йöрын
Кодлөнкö копрасьö пöч.
Машö пыр вундö да ытшкö,
Кыскалö фермаö пес.
Морöсас ёна кöть бытшкö,—
Кор нö тэ пуксьылан весь!—
Нывбаба пельпомьяс вылö
Водiс öд быдса колхоз.
Ичötик Васюкыс сылөн
Сöмын на вайыштлö оз.
Озйыд öд абу на сорва,
Абу бур тупöсь кодь нянь.
Пи вылас видзöдiг нормö
Аслас став тушанас ань.
Кöни нö Васюклөн айыс?
Мыйла нö юөр оз сет?
Пароход кывтö и кайö,
Некод тай сэтысь оз пет
Пристаньö. Ылын
Врагьяскöд тышкасьö Саш.

Верной салдатка тан, тылын,
Мырсьо веж кудриа Маш.
Кыкысь нин лэблiсны юсьяс,
Войвылö локтiсны бөр.
Войнад кө омöля узьсьö,
Пиыдкөд öтвылысь бөрд,
Бөрд... Гашкө, кокныдджык лоö!
Дзуртыштiс кок улын пос.
— Тани... Ячменева олö?..
Чöv усьлi гөлөсöй:

— Восьт...

Нывбаба кынмис. Оз шыась.
Эновтiс коньбөрöс вын.
Сикт весьтын кыпöдчысь кыа
Ворсiс нин öшиньын.
Тшын
Машөлөн синьясас сатшис.
Дзоргö... Пыр дзоргö... Оз тöд.
— Некор оз бергöдчы... Сашыд...
Отнас со бергöдчис мөд...
Некор эн ёр сыысь менö,
Уси кө ыджыдджык шуд.
Пулялысь туй визьсö венны
Тэ вöсна весиг эг куж.
Отвылысь петалiм бойö
Дзик öткодь дас куим зон...

Спас бöрын ранитчөм сойөн
Отнам ме нюжөдi вон
Видз вылын.
Нельöдысь юсьяс
Вöчисны сикт весьтын кытш.
Му вылын пондiс нин кусны
Нэмьясын аддзывтөм тыш.

Гитлерлөн медалом понъяс
 Аслыныс кодйисны гу.
 Рочьяскөд тшөтш коми зонъяс
 Дорйисны батьяслысь му,
 Му, коді быдөнлы дона,
 Вунлывтөм, муса да пось.
 Сёнъясын оз кө зэв ёна
 Туруныс копыртчы-лөсь*,—
 Косаён өвтчыны лөсьыд,
 Дөрөмысь мездөй быд кизь,
 Бара мед чужөмысь пөсьыс
 Лысваён киськалас видз!
 Некодысь Машө оз кольчы,
 Быдөнөс панйыны дась.
 Мамыслы көдзыд ва ёлысь
 Вайө со ичөтик Вась.
 — Шойчышт көть, Машукөй!—
 Сийө
 Гөлөсөс менсьым оз кыв.
 Эз өмөй шонділөн биас
 Сьөлөмсьыс шоглуныс сыв?
 Вон бердын шойччө бригада,
 Кыкөн ми бокынөсь дзик.
 Отчид көть кутлыны рад ме
 Аньыслысь гаддясьөм ки,
 Казьтыштны кыв, кодөс гусьөн
 Сьөлөмын новлөдла ме...
 Зумыштчис Маш:
 — Кызди уси...
 Пыр на эн висьтав тэ... мен...
 — Вєськыда шуны кө,— дойдны

* Лөсь, лөсьөм — водөм турун (улыс Эжваса сёрниысь).

Тэнö сэк зэв вöлі жаль...
Паметьын гымаліс-ойзіс
Му весьтö вувзысьём сталь.
Дасысь атакаö мунлім,
Дасысь жö бергöдчим бөр,
Век кежлö садьмывтöм унмөн
Рота джын кытчöдз ээ пөр.
Изъясөн пасьтöдöм дотсянь
Койисны пуля да би.
Сашö сэк му бердö водсөн
Топыда шамыртліс ки,
Шуис на:

— Найös эн вунöd...
Кольöны гöтыр да пи...

... Машöлөн вывті нин уна
Вөлöма юрас дзор си.
Кад кывтö бөрö, оз водзö,
Некод оз ло мöдысь том.

— Морöснас Саш миян водзын
Тупкис сэк дотыслысь вом!..
Мортлөн кор олöмыс кусö,
Некод оз тöd сылысь дой,
Кокныдджык висьтавны:— Уси...
Лолыслы мир да спокой!..
Ловъялы косясьны колö,
Видзны Отчизна да шуд.
Оти кыв содтыны полі,
Кыв, коді некор оз чуж.

Эжвалань бергöдчис Машö,
Сулаліс вөрзьевтөг, чöv.
Турункöд гусьöник вашкис
Кысянькö усьласьысь төв.

Төді, мый думайтис сійө:
Уна көть коли нин во,
Код сылөн сьөлөмысь виас
Нәм кежлас йиджөм любовь?
Стан дорын мыйкө на шуис
Ме йылысь кутшөмкө ныв.
Морөсад ставыс кор пуө,—
Некутшөм шутка он кыв.
Сөмын кор казытисны Машөс,
Дона да вунлытөм ним,—
Сьөлөмөдз, быттьөкө, сатшис
Косалөн төчитөм йыв.

V

Частө ме воывла öнi
Видлыны ас чужан сикт,
Том кадсө колльөдiм көнi
Уна зон öтвылысь ми.
Паметьын видзвывса вонйыс,
Сы бердын пöлынтьчөм коз.
Быдмисны мукөдлөн зонъяс
Радейтны муса колхоз.
Видзöдны на вылө любө,
Быдөн зэв варов да збой.
Гудökөн ышмөма клубас
На моз жö палялөм вой.
Шондiкөд сувтöны бара
Шызьöдны ыбъяслысь чöv.
Эз öмöй на кодь жö ярөн
Вунлывтөм Сашöным вöv?
Казьтышглө оз кодкө сийөс?
Сьөлөмлы долыд и шог...
Нәм кутас кыскыны киöd
Таланьö кутшөмкө мог.

Маш ордö кежавны, гашкö?
Дивитны некод оз кут.
Мед нинöм абусö вашкö
Туйбердса нэриник пу!
Неуна важмыштöм керка,
Важ мозыс дзуртыштö пос.
Пиыс нин, тыдалö, вермö
Лöсьöдны кок чышкан рос.
Ывлаын дöзмöдчö гудök,
Некодлы узыны оз сет.
Бара кöть важ мозыд лудйö
Зонъяскöд йöктыны пет.
Машöлөн серамыс гажа,
Эз, быттьö, аддзывлы шог.
— Фермаын уджала важöн,
Мöсьясöс вöдита...
Вот
Пиуккöд торъявны ковмис:
Борд улад нэмтö он кут!
Ме серти бурджыка овны
Велöдас öд институт.
Овны...
А кыз сэсса овны?
Висьтав тэ, чойысь бур чой,
Му вылын коркö мöй овлис
Тэысьсö бурджык герой?
Пöрысь, а важкодъ тэ пельк на,
Быдöнысь тэрыб да яр.
Шуöны, нывбаба пельпом
Ас вылас кутö му шар.
Ме кындзи гижасны мукöд
Сы йылысь зэв мича висьт,
Олöмлөн медсьökыд здукö
Кыз лоин тэ коммунист.

Чуймөмөн тэ вылө дзоргө
Стенсянь пилоткаа морт...

Гусьоник казтыштіс коркө
Том кадсянь тодсакодь ёрт:
— Машёос коралысь вөлі..
Ачыс тай сөмын эз мун...
... Восьлала лөнь Эжва пөлөн,
Повзьөдла лэбачлысь ун.
Кызд пуяс быдмисны. Кузьёсь.
Видзьяслөн оз тыдав пом.
Весиг и шорыс со узьё,
Чөскыда восьтөма вом.
Регыд нин воас сэзь луныс,
Коді оз төд мортлысь дой.
Гашкө, сэк уналөн вунө
Дөвалөн узьлывтөм вой.
Тышкасис сы вөсна Сашным,
Енэж мед пыр вөлі лөз.
Машёс эн вунөдой,
Машёс,
Ми бөрын чужысь бур йөз!
Мортыд кор сотчыліс биын,
Шулім сэк мир да спокой...
Этша ми радейтлім сійёс,
Коді геройысь герой.

1959 во.

ВОШЛӨМ МӨРТ

*„Воштан дргүс — кум во бөр-
дан, воштан Рөдина — нэмтө
ковмас бөрднү“.*

(Йбв кост сёрниысь.)

Челядь олөмыд бара ловзяс,
Кодыр казтыштан кольөм кадсө,—
Чужим-быдмылім востер зонъяс
Оти сикт помын дзонь бригада;
Оти — этатшөм, мөдыс — татшөм,
Коймөд медся нин зіль да лэчыд,
Нельөд синвасө кисьтө важөн,
Сылы кымөсас он көть печикт...
Некод дурөмын эз вөв пайтөм:
Да и томлуныс сійөн волө,
Медым нинөм на сэк не чайтны,
Кыдзи бергөдчас миян олөм,
Кутшөм туй сійө кодлы каттяс,
Кыдзи бордъялас, кытчө нуас...

Сэк колхозын нин миян батьяс
Мусө гөрисны первой тулыс.

Орччөн Семөкөд туим-быдмим.
Меысь збой сійө вөлі, варов,
Көть и шулісны сиктын быдөн,
Оттшөтш чужлім пө няньтөм арын.

Да и шуны кө ставсö стöчa,—
 Шуд он аддзыв, кор шог оз прöйдит:
 Мый нö ичöтик кинад вöчан,—
 Кык суседлөн кө му эз рöдит!
 Дöра дөрöмысь нинöм бурöс
 Ми эг аддзылöй да эг тöдлöй,
 Быттьö кутшöмкö öти сюрöс
 Йитис век кежлö öта-мöдöс.
 Ой тэ, челядьлуи, югыд асыв,
 Чужан сиктöй да, Катыв помöй,
 Кутшöм мича да кутшöм ясыд
 Сийö пöраыс, кор ми томöсь!
 Сöмын Эжва да югыд ывла
 Аслас сывъясас босьтны кужö.
 Некор Семöкöд ми эг кывлöй,
 Мый эм миянысь бурджык шудыс.
 Öдйö кывтисны бөрö вояс,
 А кор кватитчим,—
 Тырмис арлыд
 Пуджны дөрöм сос зумыд сойöдз,
 Мунны вөр лэдзны кöдзыд арын.
 Шоча воывлiм сиктö ськöд:
 Батъяс гöрисны паськыд муяс,
 А ми Семöкöд пырджык кыкөн
 Вöлим матыс да ылыс туйын.
 Мед эг тöдöй, мый водзын лö,
 Кытчö веськöдам сям да сметка,—
 Миян киясөн вöли колö
 Пöртны олöмö пятилетка.
 Пуръяс кылöдiм ськöд кыкөн,
 Вöрын уджалiг кадсö ордйим,
 И пыр ёнджыка мусаджык на
 Лои миянлы тöдса ордым.
 Семö шуывлiс:

— Ыджыд каро

Важон пышйисны миян другъяс,
А мен, верит тэ, дзонь му шарысь
Сиктысь петнысö туй оз югды...

Семö, Семö тэ!

Синъяс водзын

Сийö здукыс, кор ми прöститчим,
Сöмын зэв ылын ломзъысь кодзув
Менö колльöдiс чужан сиктысь.

Шоньд төврукöд вашкис льöм пу,

Көнкö сьылисны төдса нывъяс,

А тэ сулалiн важ моз көмтöм,

Сöмын öтнад нин...

Мелi кывъяс

Дыр на казътывлi весиг вötөн,

Ассъым Семöös, сöстöм ёльяс...

Кызь вит во ключөн пуан öдөн

Сийö кадсяньыс бөрö коли.

Шоча воыввлiс сиктысь юөр,

Но эз вунöдлы гижны мамö,

Мый колхозным пыр олö бура

Председательлөн крепыд сямөн,

Да поклонъяс тшötш сысянь тэчö.

Со пö кутшöм суседлөн пиыс!

Коркö ачыл пö карсьыл лэччыв

Да друг мортыдкöд пöся киась!

Гусьөн сьөлöмын кути завидь,

Сэк жö радуйтчи Семö шудөн.

Мыйла сы моз эз артмы ставыс

Аслам олöмын, аслам уджын!

Но война нуис ылö туйö,

Кытысь кокниа бөр оз локны.

А мен, тыдалö, рökыс шуис

Кольны ас пыдди сэтчө кокос.
Нельод во помын аддзи гортос...
Шогыс голяос дзикодз потшис,
Кодыр казътисны муса ертос
Оти кыв джынйон сомьн:

— Воши...

Воши Семоньм...

Эг шу ниньом...

Одйо петі суседъяс ордысь...

Важ моз чуксали ертос нимнас

Лымйысь кушмөм нин төдса борйын.

Мустөм кыв джынйыс йирис вемос,

Шогыс сьолөмын дзикодз ёсьмис...

Тэ кодь зоньясөс, муса Семө,

Эг од өтиос бурөс воштөй!

Мед эн веськав посмертнөй листө,

Полксянь онөдз эз сетны юөр,

И мед некод көть мен оз висьтав,

Көни кыпалө братскөй гуыд,

Но ме аддзылі сійос ачым,

Кыдзи мунөны миян зоньяс

Сэк, кор пуляыс шерөн сатшө

Да быд воськолыс сувтө дона.

Гашкө, узян тэ сьокыд унмөн

Көнкө зэв ылі паськыд эрдын,

Либө Днепр вуджиг ваө сунін,

Автомат кутиг морөс бердад.

Мый дзор батыдлы шуны верми,

Кытчө вошин тэ, кытчө лоин?

Воча кыв сетны оз тай тәрмась

Сикткөд сывъясьөм тувсов войыс.

Льөм пу юасис:

— Көни Семө?..

А ме чөв олі кыв джын шутөг.

Дзоридз чуксасис:
— Семö, Семö!..
Ассьым синваöс öдвa кути.

Тэнад дзоридзыд,
Тэнад сaдйид,
Кодöс пос помад коркö быдтин...

Лэбзьö зэв öдйö бордъя кадыс,
Кольöм вояссö помся лыддьö.
Братскöй гуяссö вевттис дзоридз,
Уна дой сэсянь важөн бурдис,
Сöмын усьöмлы сьöлöм корö
Важ моз мынтыны ыджыд уджйöз,
Сöмын сöвeсть оз чöв усь некор,
Мед не висьтавны сылы аттьö,
Выль война мед ог тöдлöй некод —
Му шар вылын медлэк проклятьe.
Татшöм мөвпьясөн быдөн олö,
Кодлөн киясыс пötöсь уджөн...
Окмыс во мысти:

— Видза олан!..

Он нин тöдмав тэ...
Он нин куж öд...
Тöдса синкымъяс, тöдса чужöм,
Кыськö аддзылі, быттьö вötөн...
Шоча овывлö: мортлөн вуджөр
Вермö виччысьтөг мөвптö сотны...
— Семö...
— Ме...
— Тэ нö... ловъя?
— Ловъя...
Кöть и важөн нин менö дзебин,
Но ме кулöмсö верми венны...
Локта ылысь ме...

Локта... пленысь...

Мыйла юасыны? Мыйла дойсö
Колö вөрзёдны, колö йирны,
Мелі кодзулөсь тайö войыс
Кор оз аддзы нин мортлысь вирсö,
Кор оз гарт, кызди кокни лыа,
Йёзлысь олөмсö биа бушков.

— Пыр на жалита,
Мыйла шыөн
Ассым сьөлөмөс сэк эг сутшкы...

Озйис енэжын лыдтөм кодзув,
Лысва дзирдаліс векни борйын,
Кыв джын шутөг ми мунім водзö,
Чөла восьлалім Эжва дорö.
Семö зумыштчис.

Ме эг юась.

Кыкөн видзөдім ылö водзö,
Небесакөд -көн йитчис муыс
Горизонт визьөн вөнъён моз жö.
Челядь кадö өд чайтлім пыр ми, —
Мулөн пом сәні, водзын — море...
Но өд восьлавны ставлы тырмис
Юрси дзормытөдз, кок сөн ортөдз...
Кодыр сьөлөмад мыйкө кутан,—
Сійö пыдөджык ачыс сатшö.

Семö киясöс менсьым кутіс:

— Бухенвальдлысь ме юи чаша...

Юи медбөръя курыд войтөдз...

...Эг кор ачымөс сэк прөститны,

Война бөрын кор аддзи мусö,

Коді, төдөмысь, эз нин виччысь,

Коть и олөмөй эз на куслы...

Ассым ёртъясöс ме эг вузав,

Враглөн танкъясысь ме эг повзвы.

Пуля морөсө сатшис...

Уси...

Сөмын думышти:

— Со и овсис!..

...Тышыс гымалис ылын, водзын,

Чужан му вылын, асиввылын.

Сөмын енэжын югыд кодзув

Менсьым ойзөмөс, гашкө, кыліс.

Кымын час, кымын вой ме куйлі,—

Некод та йылысь өд оз висьтав.

Садьой воліс кор,—

уйи, уйи...

Лолөй вирыскөд өтсор киссис.

Сэсса мый лои,—

Ог нин помнит...

Быдса нэм быттьө колис кадыс.

Көсийи овны ме, овны,

овны,—

Гөгөр вөліны йөз салдатъяс,

Гөгөр вөліны зывөк кияс,

Кодъяс лэптісны муысь менө...

Мед оз ёр вошөм батьсө пиыс,

Коркө ме моз кө воас пленысь!

Аслам мамөй кө менө аддзис,

Батьөс ловйөн кө гортысь суи,

Мен эз ло эськө сәки яндзим,

Муса нимнаныс найөс шуны!

Тувсов енэжті дзодзөг котыр

Кутіс войвылө төдса ордым.

Зверысь омөльдзык, лёкджык войтыр

Менсьым домлісны доймөм бордъяс.

— Коммунист!..

Скөрысь горзө өти.

— Комиссар?..

Төдны колө мөдлы.

...Эн мөй ичөтсянь менө төдлы:

Сьөлөм менам эз тірав ньөти,
Көть и юрсиөд кодкө нистіс,
Кодкө кучкыліс весиг нырө...
Но эг вөвлы ме коммунистөн,
Беспартийнөй и өні пыр на...

— Коммунист?!.

Кылөй кынмис. Воши...

Морөс йөрышын ставыс пуис.
Ведрa ва эськө ыджыд көшысь
Тайө здукө ме өтнам юи.

Но эз ваөн, а көрт прикладөн
Найө зургисны пөдса вомө.

— Коммунист!..—

Гашкө, кувны кад нин?

Татшөм мукаыс оз мөй помась?

Но эз дойясыс сотны вемөс:

Кыкысь некод өд эз на кувлы...

Мый жө, Рөдина,

мый тэ меным,

Вошөм пиыдылы, өні шуан?

Медлөк кывьясөн, гашкө, казытан,

Весиг челядьөс менсьым ёран,

Медым нимлөн да овлөн горыс

Миян му вылын оз нин паськав...

Клятва сетлім өд бойө мунтөдз,

Знамя окалім пидзөс вывсянь...

Медым нөйтөны, колөк, кувтөдз,

Но оз шедөдны менсьым кывсө!

Тувсов енэжті дзодзөг котыр

Кутіс войвылө төдса ордым.

Мыйла, мыйла жө шудтөм мортлы

Абу сетөма вына бордыяс?

Өдйө кыпөдчи эськө вывлань,

Чужан муланьö пыр жö тövзи. . . .
Бухенвальд...

Тайö ним кор кывла,
Лөгөн сьөлөмöй öнi öзьяс.

Но эз чег менö сьökыд мука.

— Кутчысь, зон! —

гусьөн шулис öти,
Кодi микöд жö ставсö юклис
Да эз торъявлы меысь ньöти.

— Кутчысь, зон! —

сöмын шулис сийö,
Кодыр вöтлисны менö стройö.
Сылөн синьясысь лэчыд бияс
Эськö аддза ме пемыд войын;
Быттьö шондiлөн сöстөм югөр
Пемыд гу пытшкö гусьөн волис.
Тадзи югдöдiс тöдтөм другыс
Ме кодь зоньяслысь шудтөм олөм.
Сийö висьталис:

— Воштан өртös, —

Куим во, гашкö, бöрдны ковмас,
Ассьыд воштан кө муса горттö, —
Олөм помöдз он мынтысь ловнад...
...Тайö лои странаын, кодi
Пыр на ошйысьö аслас честьөн,
Серам вылö — сьвятöй Свобода
Изйысь кыпöдiс ас му весьтас.
Том боец ыджыд правда шуис,
Том боец проклянитiс найös,
Кодьяс пыр дасьöсь ставнас мусö
Сотны выль мирövöй войнаын.
Кöть эз вöv том салдатыс мыжа, —
Сыысь повзисны, кыдзи биысь.
И Сенат прикажитiс пыр жö

Дорны чепъясөн мортлысь кияс;
Сэсса суд водзё сійё сувтіс:
Ичот морт вылад судыд тэрыб.
Том салдат сэсса аслас кувтөдз
Чужан мулысь эз аддзыв берег.
Сійёс новлөдліс гыа море,
Океан сылы өтнас мойдіс,
Көть эз мүсё да васё ёрлы,
Найёс лёк кывйөн эз жё дойдлы.
Кымын во, кымын вося мука
Мортыс сьөлөмас помся кыскис,
Чужан му йылысь некод мукөд
Сылы казтыштны кыв эз лысьтлы.
Кодыр кутіс нин лолыс петны,—
Важ брезент сэки тырмис сылы,
Медым эновтны югыд светсё
Чужан мусяньыс көнкө ылын.
Тайё лои странаын, коді
Зильё ошйысьны аслас честьён...
Рөднөй мунымлөн югыд шонді
Кутас дзирдавны миян весьтын!
Том салдатлысь судьба ог юкөй...
Сійё быдмыліс Вашингтонын,
Көні долларлөн ыджыд чукөр
Сөмын озырлысь олөм шонтө.
Медым враг өні песё лёксё:
Вольнөй лэбачёс он кут пленын!..
Сувтөй өтвылысь, дона вокъяс,
Водзё тышкасьны,

овны, венны!..

Уна кыпыд кыв, уна висьт на
Тайё мортыслысь быдөн кывліс...
...Тувсов асылө коммунистёс
Стража миянысь гусьён лыйліс,

Лыйліс миянлысь муса ёртӧс,
Коді сьӧлӧмас ставлы кӧдзис:
— Воштан ассыд кӧ чужан горттӧ —
Нэмыд чӧж сэсса ковмас бӧрдны!
Ярлун морӧсӧ сэки йиджис...
Ота-мӧднымлысь кутлім кияс
Бухенвальд йылысь паметь гижны
Сьӧлӧм пыдӧсысь кыптӧм биӧн...
Гуся видзӧдлас... Гуся кывъяс...
Кӧть и пленинӧсь — абу рабъяс!
Сійӧс, ёртнымӧс коді лыйліс,
Аслам киясӧн суйи вадйӧ,
Сэсса пышйи...

Ми пышйим дасӧн:
Вӧльнӧй му вылын чужӧм зонъяс,
Мездлун шедӧдны вӧлім дасьӧсь
Сэки медбӧръя вир войт донӧн.
Кор война юргис Волга бердын,
Враглӧн кийн на вӧлі Киев, —
Автоматӧн Европа эрдті
Восьсӧн мунісны вошлӧм пиян;
Юргис сьыланкыв Эжва йылысь
Партизанъяслӧн ыджыд станын...
Лыйлӧм ёртнымлӧн

биа кывйӧн

Сувтім тышкасьны враглы паныд.
Семӧ помаліс...
Курыд думыс,
Гашкӧ, сьӧлӧмсӧ пыр на дойдіс?
...Татшӧм паськыда миян юным
Некор, шуӧны, эз на ойдлы.
Ваӧ келісны пасьтӧм бадьяс,
Кывтӧ на весьтын югыд кымӧр,
Чужан мунымлысь пом он аддзы,

Сылысь эрд весиг мөвп оз шымырт.
Тайо му весьтын кодзыд арын
Тувсов шонди кодь шонди чужис,
Коди бушколысь вына ярлун
Мортлы сьолөмас пыртны кужис.
Ог од прөста ми шуой мамон,
Медбур кывъясон нимтой сийос...
Муса Рөдина! Сет жө сямлун
Ещө люлюын куйлысь пины,
Медым видзис пыр сьолөм бердас
Челядьлун йылысь муса паметь...
Миян му шарлөн ыджыд эрдысь
Эз на путкыляв вына амысь
Став границаяс... Коди төдө,
Коди висьтавыны тайос кужас,
Кутшөм туй вывти ота-мөдлы
Югыд аскио ковмас вуджны?
Воштан другос кө, зэв дыр бөрдан,
Воштан Рөдина...

— Видзөд, Семө,
Татшөм кымөръяс, ва да вөр ди
Сэсса мөдлаын көнкө эм-ө?
Он шу нинөм тэ... Ачым аддза:
Восьса синъясад ловзьо тулыс.
Коскөдз келісны пасьтөм бадьяс
Васө Эжваысь бара юны...
Челядь кокъясон тальөм туйыс
Бара нуөдө муса гортад...
Кодкө лысьтас мөй тәнө шуны
Чужан му вылысь
вошлөм мортөн?

ВӨРСА МОЙД

Веж ягъяс вывті шөйтiм ми
Да вуджим лыдтöм нюор,
Пыр, чайтiм, налөн некор дзик
Пом-пыдöсыс оз сюр.
Сёр рытын Йортöм берег дор
Друг аддзис мян син.
Вөр керка дорын пöрысь морт
Дзик öтнас пестiс би.
Тшöтш перйим сэк походной пöрт,
Да зiля öшим тшöтш.
Öд вöрын быдсөн дона ёрт,
Öд вöрын быдсөн гöсть!
Сьöd борднас вевттис кырныш-вой
И вөр, и ва, и му.
Но мыйла, мыйла югыд ёль
Оз аддзы чöскыд ун?
Эз вуджлы кодi парма-рас,
Дерт, висътавны оз куж,
Кыз шувгö унмö вöйöм яг,
Кыз варовитö ю.
Эн волы пармаö кö тэ,
Эн колльöd сәни вой,—
Он тöd, кызд еджыд тошка дед
Пыр каттё ассъыс мойд.
Öд челядь дырсянь быдөн ми —

И тэ, и ме, и вок —
Быд мойдлысь видзам ыджыд мич,
Кыз первойя любов.
И коді выльысь абу рад
Тан пальодны том ун!
Од муса асланым том кад,
Почётын — пöрысьлун.
— Эк, зонъяс,— сёрни паніс дед,—
Ен сетіс мортлы кыз,
Но эг на кывлы некор ме
Мöд сэтшöм сыланкыв,
Көн эськö оліс ва и вөр,
И мортлөн шог и шуд,
Но аслам сёрниислысь шöрт
Ме йитлыны ог куж...
Со сійö кыскис табак доз
Да босьтіс биа рос,
Но пöрысь мортлы быдса содз
Ми сетім папирос,
Мед сöмын сёрниис эз ор,
Кыз орö рыжмöм тыв.
...Яг весьтын кодзувлөн дзонь шор
Лöz эрдын восьтіс сыв,
Но öти кодзув чуктіс сәсь
Да усьны кутіс друг,
Кыз быттö сылысь югыд след
Ёсь йывнас вундіс пурт.
И бара пемдіс...
Кыйсьысь морт
Эз лэптыв весиг юр.
Ю сайын öтнас вошöм морт
Ми пыдди вуджис нюр.
— Ті, том йöз,— водзö шуис дед,—
Он төдöй,— коркö тан,

Важ йӧзсянь кыдзи кывлі ме,
И овліс Олек Сан...
Зэв дошлӧй сійӧ вӧлі морт:
Смел, удал, вына, збой —
И уджын сылысь нинӧмтор
Эз мудзтӧд крепыд сой.
Но сылӧн шудыс вӧлі чер,
Дон горйын пуӧм кӧрт...
Эг кутлив тайӧ черсӧ ме
Да ошйысьны ог мӧд,
Но сылысь ыджыд куим дон
Ен мортлӧн тӧдіс ки:
Кор кучкас сійӧн удал зон —
Вӧр пасьта кыптас би;
Кор чернас мӧдысь сӧтас зон,
Сэк босьтчас ыджыд тӧв,
И тайӧ паськыд Йӧртӧм дор
Пыр воштас асьыс чӧв.
А нӧшта сӧтыштас кӧ морт
Да черӧн кисьтас чаг,
То синваысь на сӧстӧм шор
Сэк чужтас джуджыд яг.
Уралын, кисьтӧны кӧн кӧрт
Да калитӧны сталь,
Роч мортлӧн кийсь донатор
И аддзис Олек Сан.
Гӧль коми мортлӧн муса вок —
Искуснӧй роч кузнеч,
Кыдз ичӧт воклы ыджыд вок,
Шуд вылӧ дорис чер.
— Мед тайӧ черыс — дружба пас —
Ми костын нэм оз быр,
И,— шуис,— рочкӧд комияс
Мед ӧтлаынӧсь пыр.

Кыз сөмын сөтыштис ён ки
Яг вылысь пожом пу,
Пыр кыптис вөрүн ыджыд би,
Лёк йөзлы потшис туй.
Виль стража татчө ыстис царь,
Мед мортос дорны пыр,
Но кыкысь сөтис Олек Сан,
Став пуяс өвтигтыр,
Друг кыптис төв. И некод тась
Эз аддзы петан туй,
Став парма пасьта ыджыд ва
Тан пөльтчис, кызди ю.
И тайо юлы коми морт
Ним сетис Йөртөм ва,
Көн лёк неправдаыслысь горш
И пөдтис Олек Сан.
Со сийо шлывгө водзө пыр
Век важкодь збой да том.
Жаль, мортлы сылысь сёрни-кыв,
Зон, велавны оз позь,
Но важ йөз помнитоны век
Смел морт йылысь бур висьт.
Мен тайос висьталис дзор дед,
А мясянь кылис пи.
Неправда сәки вөлі ён:
Сы кийн вөлі власть.
Невөля везйин и роч вок
Эз вермы сетны отсөг, зон,
Тән, удал Олек Сан!
Сибирө перйыны руда
Кык стражник костын сәк
Нәм кежлө ыстис мортос царь,
И кылис чужан му и ва,
Кызд шогсис сьөкыд чеп...

Но черыс лёк йӧзлы эз сюр.
— Со тайӧс видзӧй тӱ,—
Сэк шуис йӧзлы,— воас лун,
Кор враглӧн киссяс вир...
И збыльмис сылӧн ыджыд кыв:
Народлы ковмис чер,
Кор пансис мездлун вӧсна тыш,
Кор врагкӧд пансис вен.
Уралса отсалис кузнеч
Смел коми мортлы тан
Ас киас босьтны шудсӧ сэк,
Став чужан му и ва.
И озыр йӧзыслысь лёк власть
Сэк киссьӧмысь эз пык
Английскӧй пушка да тесак,
Американскӧй штык.
Выль томлун аддзис парма-вӧр,
Выль шудлун аддзис му,
Кӧн юргӧ сыланкывлӧн гор
Да вӧльнӧй мортлӧн удж.
И тайӧ югыд Йӧртӧм ва —
Том йӧзлӧн медбур друг.
Быд тӧв и тулыс — некор тан
Оз ланьтлыв кыпыд удж.
Вӧр лэдзысь кийн лэчыд чер
И электропила,
Мый йылысь мӧвпыштнысӧ сэк
Эн кужлы, Олек Сан!
Дыр кывзӱм дедлысь тайӧ висьт.
Веж пармалысь важ мойд.
И бипур югӧр улын ми
Эг тӧдлӧй, коли вой.
И сӧмын лэбач чолӧм-кыв
Выль лунлы сылис кор,

Ми тэчим сьӧлӧмӧ мойдкыв
Да колим Йӧртӧм дор.
Кӧть кадыс вӧлі ёна водз,
Но кыакӧд жӧ тшӧтш
Делянка сьӧлӧмын мотор
Вӧр пасьта кисьтис дрӧб.
Сэн вӧлі сиктса варов зон
(а, гашкӧ, дедлӧн пи!)
Кер тырӧн кыскис уна додь
Том, удал тракторист.
Збой нывлӧн киясын мотор
Кыз ворсис, завидьлун
Ме сәки ассьым, дона вок,
И дзебнысӧ эг куж.
Пыр меным кажитчис, со тан,
Кӧн кывтӧ Йӧртӧм ю,
Збой уджын удал Олек Сан
Тшӧтш юкӧ йӧзлысь шуд.

УЧИТЕЛЬ

1

Ланьтöма ыджыд посёлок,
Быдөнöс личкöма ун,
Сöмын учитель пыр олö,
Шойччыны öтнас оз мун.
Шоча мöй ковмывлö сылы
Вой шөрöдз пукавны тадз?
Куйлö на тумбочка вылас
Восьтлытöм уна тетрадь.
Неуна сёрмыштіс бара,—
Школьникъяс гижисны висьт.
Турöбыс йиркөдчö яра,
Керкаö сöмын оз письт.
Уна во коли нин бөрö,—
Сумкаын кадтö он видз!—
Первойысь уджавны вөрö
Локтіс кор Павел Ильич.
Школаыс вöлі сэк ичöt
Да и учительыс том.
Дзирдалысь биясөн мича
Пармалөн лои быд пом.
Панйис и юрсисö кадыс,
Эзысь нин кисьтыштіс содз...
Челядыс батыөн нин радöсь
Шуны, но тадзсö оз позь.
— Павел Ильич!..—

Сөмын кылан

Быдласянь:

— Павел Ильич!..

Чужигас шуд вылө сылы

Сетисны зэв гора вич.

Мөвпъяс...

О, уна жө мөвпъяс

Йиджтис учительлөн юр!

Турөбыс ёнджыка лөвтө,

Толаөн тыртө быд нюр.

Гөтырыс важөн нин водис,

Мөвпъяссө нинөм оз торк.

...Ылі посёлокө подөн

Школьникъяс мунисны сер...

Куйлөны восьса тетрадьяс,

Сотө учительёс дой...

Павел Ильич сөмын аддзө

Пемыднас букыштчөм вой.

Турөбыс өддзө и өддзө,

Ывлаас сы вөсна шум,

Быттьөкө отвылысь коддзис

Сынөдысь торъявтөм му.

Татшөм лёк войясө понсө

Ывлаын некод оз видз.

Мыйла нө ичөтик зонсө

Мөдөдіс Павел Ильич?

Ичөтик Васьёсө?.. Сылөн

Куйлө со төдса тетрадь...

«...Батьёос дзебисны ылө...

Батьөйд быдөнлы жаль...»

Висьтыслысь этатшөм строчка

Кокниа некод оз гиж,

Синвалөн паськалөм точка

Некытчө сэтысь эз йидж.

Букваяс сувтісны радён,
Кыдзи салдатъяслён строй.
Васялён бать мирной кадё
Уси, кыдз збыльысь герой
Йёз муын, сэн, Будапештын,
Озйыліс көні мятеж...
Пызансё тэрыба вештіс,
Сувтіс учитель:

— Кеж

Син водзысь, омлялысь турёб,
Сійё и менам өд пи...
Вуджны нель верст пасьта нюрсё
Верстьё морт талун оз пьсьт!

2

Шувгёны пожомъяс нора,
Турёблысь содтёны гор.
Павел Ильич асьсё ёрис,
Толаё воськовтіс кор.
Колё жё тадзисё лоны —
Отчыл да воштыны сям...
Зонмыс кө гортас эз волы,
Сійёс кө виччысьё мам?!
Одйёдзык восьлавны колё,
Воштыны кадсё оз позь!
Гашкё нё, весьшөрё полём
Сьёлёмсё нюкыртё водз?
Керкасьыс петігас шарпён.
Тэрыба көртыштіс юр.
Некор на, кажитчё, ар пом
Морт вылын тадзсё эз дур.
Тырис учительлён лолыс,
Вод да көть лымйёдыс уй.
Нексд дзик өні оз волы

Индыны тола пыр туй.
Мусянныс енэжөдэ быттё
Тыртис планетасё лым...
Ловъя морт ськөд оз лыддысь,
Сьөлөмыс сьлөн кө пым.
Павел Ильичлөн көть важөн
Кольёма котралан кад,
Челядьлөн бырлывтём гажөн
Нэм помсё колльөдны рад.
Челядьлөн...
Мам чужтё найёс,
Лелькуйтё батылөн бур ки.
Коркё учительлысь пайсё
Кужам-ө донъявны ми?
Быдөнлы юкыштё сійё
Вежөрсё асьыс да шуд,
Медым и ваис и биис
Кусыньтны мортёс эз куж.
Син ни пель водзысь оз тыдав...
Көн мөд посёлокыс, көн?
Нюр весьтын ёнджыка лыбё
Пельястё орөдысь звөн.
Тати-ө восьлалис Вася?
Мөдлаті эз жө өд кев!..
— Ва-а-а-ся!..
А кылас мөй Вася,
Гөлөстё мыйта көть зэвт!
— В-а-а-ся!..
И чужлас и кулё
Вөр весьтын слабиник гор.
Быттёкё зурасяс пулань
Ранитчём пөткәлөн борд.
Синвайд мортёс оз янөд...
Синва-ө? Пөсьыслөн войт!..

Сувтіс учительлы паныд
Му весьтын вöвлытöм вой.
Воськолыс ньöжмис нин дзикöдз,—
Тэрмась жö, Павел Ильич!—
Аддзан со, воöма пикö
Коз бердö йöжгыльтчöм пи...
— Вася!..
Оз шыась нин...
— Вася!..
Ме тайö... кылан, он?.. Ме!
Тэнад посёлокöдз тасянь
Куим верст бура на эм!
Медым көть комынысь унджык,—
Пармаса ордымыд кузь!—
Этша мöй морт вывті вуджлö
Сьöкыдлун, тöждысьöм, мудз!
Гегдiсны зонмыслөн кияс,
Синъяссö топöдiс ун...
Морöснад тэ шонты сийöс,
Öдйöджык сывъяв да ну!
Тэрыба кыпöдiс Васьöс
Пиöс моз Павел Ильич...
Туй пöлөн кыпалысь расыс
Аддзис морт сьöлöмлысь мич.

3

Онi кө волыны вөрö
Коркö тi корсьланныд кад,—
Школасö кытшалысь йöрысь
Аддзанныд вежöдысь сад.
Выль интернат эз на важөн
Пожöмъяс чукөрö пыр,
Челядьлөн бырлывтöм гажөн
Сийö и шуда и тыр.

Тані и Васяным оло,
Велөдчө медбөръя төв.
...Бара нин узьö посёлок,
Бара нин ланьтöма чөв.
Мудзисны мамъяс да батыяс,—
Найöс ог садьмөдöй ми.
Кежалам сэтчө, кысь аддзам
Кодзув моз югъялан би.
Пöрысь учитель!
Важ уджйöз
Онөдз эг мынтыв и ме,
Тэнад көть син водзад вуджис
Томлунөн збоялысь нэм.
Здук кежлө кыпөдлы юртö,
Васялысь эновтлы удж.
Сьөлöмын некутшөм буртор
Тэтöгыс, төда, эз чуж.
Төвзясны зэв уна вояс,
Му лоö өтторъя сад.
Коркө и миянöс воас
Бур кывйөн казтылан кад.
Чуймөдас нылöс и пиöс
Вөвлытөм нэмыслөн мич.
Төдтөм поэт тэныд сиас
Сыланкыв, Павел Ильич!
Мед тэ эн Васялөн бать моз
Шуд вöсна тыш вылас мун,
Ыджыд да биапöсь аттьö
Тэн, медводз, шуны оз вун.
Некор тэ эн вөвлы көдзыд,
Некодöс бокö эн чөвт,
Быдөнлы сьөлöмас көдзин
Медся пöсь көсийөм да мөвп;
Радейтны мамысь на ёна

Велөдін ассыным му.
Кодлы нө тэысьсө дона
Югыз Дунай сайса гу?
Медым ми кыкнанным дзорёсь,—
Бур, кодыр вежөрным том!
Ни өти кывйөн ог ёрөй
Туйнымлысь матыстчан пом.
Кыпөдчө вөвлытөм шонди
Му весьтын, Павел Ильич!
Васялы,
Васялы пондас
Козьнавны кувлытөм мич!

1960 во.

ОГЛАВЛЕНИЕ

Партия да рѳдина йылысь

Партия йылысь кантата	5
Коммунизмлѳн кодзув	9
Быль вося войѳ	11
Кымѳртѳм асылѳ петав	13
Бур асыв	14

Лѳз енѳж улын

Ми воим чумѳ	17
Небесаті кодыр ѳтнас	19
Ненец Олей оліс ыджыд нѳм	20
Ме радейта келавны тундраѳд, вѳрѳд	21
Берег дорын шойчѳны кунгасъяс	22
Аргиш туйсѳ турѳб ѳдйѳ толас	23
Кузь туйѳ мѳдѳдчан луно	24
То кѳдзыд, то турѳб	25
Пожѳм	26
Нянь	28
Дас ѳти зон йылысь баллада	31
Колѳ жѳ чукѳртны сѳтшѳм терпенье	33
Копрасъѳ дзоридз	34
Коді медвода вѳчис томан	35
Зѳр бѳрын	36

Европа ыбөр

Дзирдало море	39
Коркө верма мой вунөдны	41
Соррентоо бөр лок	43
Война вылын воштіс писо	45
Аслад му динө радейтөм	46
Пер-Лашез	48
Сьыланкыв	49
Сёрнитө Николас Гильен	51

Сьёлөмын муслун

Турияс лэбөны бара	55
Нимлунөс пасйыны ме ордө кеж	57
Пуяслысь вижөдөм коръяс	58
Бусын пыста дыр кө пессьо	59
Калялысь бөрдөмсө некор оградейт	61
Ой тэ, лөнь да шоныд вой	62
Медся сьөкыд сэки овны	63
Радейта тыяс да юяс	64
Неуна кынмыштлаө, неуна сылө	65
Зарава	66
Чужис-быдмис сьөд вөр шөрын	67
Радейти-надейтчи	68
Озырлункөд ме ог чайт	69
Мед, колөк, шуоны быдөн	70
Өвтчө өшинь улын	71
Эжва весьтын кодзув моз	72
Төлыськөд орччөн	73
Мыйла ассьыд вежөр, ассьыд эбөс	74
Эн верит некор сылы	75
Ми ставным вөлім коркө томось	76
Төвся мойд	77

Дворидзвяс öвтöны юрнас	78
Ва дорын шогсьö да норасьö истан	79
Кöкис повтöм кöкыс	80
Радейтис нылöс том зон	81
Оз узьсыы, кöть синьясöс перьяв	82
Тувсов серпас	83
Лым улын Ярөньга чöскыда узьö	84

Позмаяс

Машук	87
Вошлöм морт	100
Вöрса мойд	112
Учитель	118

Серафим Алексеевич Попов

ПОД ГОЛУБЫМ НЕБОМ

На коми языке

Редактор С. Морозов
Худож. редактор М. Безносков
Техн. редактор И. Оплеснин
Корректор А. Чеусова

Сдано в набор 4/VI-60 г. Подписано к печати
5/XI-60 г. 70×92/32. 2 бум. лист. 4,68 печ. л.
(Уч.-изд. лист. 3,7). Тираж 2000. Заказ № 2410. Ц01486.
Цена 3 руб. 35 коп. с 1. I. 61 г.—34 коп.

* * *

г. Сыктывкар, Республиканская типография
Полиграфиздата Министерства культуры
Коми АССР

